

Xtiidxza'c Jesucrist ni bacaa San Marcw

*Rzuloj Waj rulüüman xtiidxza'c Jesucrist
(Mt. 3:1-12; Lc. 3:1-9, 15-17; Jn.1 :19-28)*

¹ Ze guzuloj xtiidxza'c Jesucrist, Xi'n Dios.

² Guyu tijb Bén badëë xtiidx Dios loj ree bejn brii lajman Isaías, bacaaman xtiidx Dios, rëbaman:

Naj rxhial tijb Bén ned lojl,
Bén güünchaaw xnejzil.

³ Rguien cha' tijb Bén rbidxa' loj yujbidx, rëbaman:
“Gol beenchaaw xnejz dux Dad ree, gol guxhal tijb neyz nali.”

⁴ Zian bi't Waj Bén baroobnijs bejn ree, guzujman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëë reeman.

⁵ Gra ree Bén zojb niz Judea, në ree Bén Jerusalén brii reeman zicaagdiajg reeman ni rniee Waj, abi' rxhioobdol reeman. Zianz ruroobnijs Waj laa reeman loj guiiw Jordán.

⁶ Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn. ⁷ Chi guneenëman bejn ree, rëbaman:

—Xichan zëëd tijb Bén mazri zojbloj guial lon, ni'qui xgurëchaman ad zajct gaxhiecan guial mazri zojblojman guial lon. ⁸ Naj curoobnijs lëjt con nijs, per laaman guroobnijs lëjt con xSprijt Dios.

*Riobnijs Jesús**(Mt. 3:13-17; Lc. 3:21-22)*

⁹ Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiiw Jordán. ¹⁰ Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman. ¹¹ Dxel biguien cha' bejn xanyabaa, rëbaman:

—Lüj naj da Xi'nan, rënan lüj rabaanë' tëen lüj.

*Been xindxab Jesús prueb**(Mt. 4:1-11; Lc. 4:1-13)*

¹² Dxel binë xSprijt Dios Jesús loj yujbidx. ¹³ Ni guzuman tiuu dxej tiuu guiaal, loj ree bedoxh. Abi' been xindxab laaman prueb chitëë nuzoobaman xtiidx Dios, guiáad ree xianjl Dios gunaj laaman.

*Rzuloj Jesús rulüüman bejn ree niz Galilea**(Mt. 4:12-17; Lc. 4:14-15)*

¹⁴ Chi mal guyu Waj ladxguiib, wej Jesús niz Galilea bigneeman xtiidxza'c Dios, ¹⁵ rëbaman:

—Ma bidxin dxej zëed xgualrniabee Dios gajxh, zeel gol bayüjn xgab por xtolidi, gol bililadx tëë xtiidxza'caman.

*Rbejdx Jesús tajp ree bén gac xbejnman**(Mt. 4:18-22; Lc. 5:1-11)*

¹⁶ La'tgaj caza Jesús ro'nijsdoo Galilea, baguiaaman Simón në bijchaman Andrejs, cuzaal xguijxh reeman lojnijs din guiniaaz reeman bëjl. ¹⁷ Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

¹⁸ Loj hor guin gajc basa'n guijxh rniaaznë reeman bëjl persi zinal reeman Jesús.

¹⁹ Guzaman zatibda'n, dxel baguiaaman Jacob con Waj bén naj ree xi'n Zebedeo, yu' reeman loj barcw rayüjnchaaw xguijxh reeman. ²⁰ Dxel gurejdx Jesús laa reeman, abi' basa'n reeman Zebedeo loj barcw guin, bén naj xdad reeman con ree xmojsaman, guiáad laa reeman zinal reeman Jesús.

Rabëë Jesús xindxab luxdoo tijb bejn
(Lc. 4:31-37)

²¹ Chi bidxin Jesús luguiedx Capernaum. Abi' dxej raziiladx ree bejn guyuman lën xyadoo ree bén Israel culüüman laa reeman. ²² Dád radxa loj reeman zi'c rnieenëman laa reeman guial rulüüman laa reeman zi'c tijb Bén rniabee, ad rulüütaman zi'c rulüü ree mextr rajc ley. ²³ Lën yadoo guin yu' tijb xin yu' xindxab luxdoo, dxejczy guridxa'x rëbix:

²⁴ —¿Xhie rënl con dunujn, Jesús Bén Nazaret? ¿Zëedil ya zidganijtíl dunujn? Nünbeen lüj, rag-been guial naya nalil najl xi'n Dios.

²⁵ Dxel gudilë Jesús xindxab guin, rëbaman:
—¡Bacwëöz ro'l, barii luxdoo xin guin!

²⁶ Abi' been xindxab guin xin guin zi'c Bén rëjtya', zianz gurixdiajx rejs, bariix luxdoo xin guin. ²⁷ Graczi ree Bén riga' dád badxaloj reeman, riniabdiidx loj lasa' reeman rëb reeman:

—¿Xhie ree nicüban rulüü Bén guin? ¡Con guial-rniabee ni rajpaman xt ree xindxab ruzoob xti-idxaman!

28 Tibrajtzi bire'ch xtiidx Jesús guidib niz Galilea.

Rayüjn Jesús xnasuegr Bëd
(Mt. 8:14-15; Lc. 4:38-39)

29 Bariiz reeman lën yadoo guin, binë Jesús Jacob con Waj lidx Simón con Andrejs. 30 Abi' naga' xnasuegr Simón, yu'man xliaadoxh. Dxel bagojn reeman Jesús guial ragxuuman. 31 Abi' gubigaman cwë'man gunaazaman yaaman, gulesaman laaman. Loj hor guin gajc bariiman xliaa guin dxel guzuloj cudëédaman ni gaw reeman.

Rayüjn Jesús zien ree bénragxuu
(Mt. 8:16-17; Lc. 4:40-41)

32 Chi ma gurej guiaal, binë reeman bénragxuu ree lod za' Jesús, në ree bén yu' xindxab luxdoo. 33 Graczi ree bén luguiedx guin bido'p ruyu lod za' Jesús. 34 Bayüjn Jesús zien ree bén rajc ree gadxagayaa guialguijdx, babëë tëëman zien ree xindxab luxdoo ree bejn. Per ad rudëëtaman mod guiniee ree xindxab guin guial nünbee reex laaman.

Rülüü Jesús xtiidx Dios niz Galilea
(Lc. 4: 42-44)

35 Bixche Jesús rsildoo, chi ziiz nacay, briiman luguiedx guin wejman tijb luar lod achutczi bejn zojb, persi gurejdx gunabaman Dios. 36 Abi' Simón con ree xcompniaraman bigdiil reeman laaman. 37 Chi badxejl reeman laaman, rëb reeman lojman:

—Gra ree bejn cayguiil lüj.

38 Per rëbaman loj reeman:

—Yo' ree guiedx ni riga' ree gajxh din gulün xtiidxza'c Dios, din par zian zialan.

³⁹ Abi' balüü Jesús xtiidx Dios lën ree xyadoo ree bën Israel guidib niz Galilea babëë tëëman xindxab luxdoo ree bejn.

*Rayüjn Jesús tijb bën rajc guialguijdx la lepra
(Mt. 8:1-4; Lc. 5:12-16)*

⁴⁰ Tijb bën rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiënl, zajc yayüjnl naj.

⁴¹ Baya Jesús laaman, baqui'man laaman, rëbgajman:

—Rënan, bayajc.

⁴² Chi gunee Jesús zian, hor guin gajc bayajc bën guin abi' baya xcuerpaman. ⁴³ Dxel bagu'nejz Jesús laaman, rëbaman lojman:

⁴⁴ —Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguiaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

⁴⁵ Per bën guin chi ziaman guzuloj catie'chaman diidx loj gra bejn xhienaag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zobj. Per gra lad rza ree bejn rej reeman lod za'man.

2

*Rayüjn Jesús xin nëjt xcuerp
(Mt. 9:1-8; Lc. 5:17-26)*

¹ Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj, ² tibrajtzi bido'p zien da't reeman lod za'man, xt ni'quid rdaant ro' port chu' reeman,

guiáad laaman culüüman laa reeman xtiidx Dios.
³ Dxel bidxin tajp ree bejn yagaj lejn reeman tijb
xin nëjt xcuerp. ⁴ Per ad gojct niunë reeman laax
lod za' Jesús guial bén guixiuj guidxa. Abi' guxhal
reeman guijc yu lod za'man persi gulet reeman
xinragxuu guin guidib ni naga'x loj xt lod za' Jesús.
⁵ Chi baguiaa Jesús guial rliladx reeman laaman,
rëbaman loj xinragxuu guin:

—Xi'n, ma benan xtolil perdon.

⁶ Per yagaj zobj tio'p choon ree mextr rajc ley,
been reeman xgab naladx reeman: ⁷ “¿Chexc zeel
rníee xin guin zian? ¿Chexc zeel rüjnx mazri xin
zobjloj guial loj Dios? Achutczi rajc rüjn perdon
dol tijbzi Dios.” ⁸ Per gogbee gajc Jesús xgab cayüjn
reeman, dxel rëbaman:

—¿Chexc zeel rüjndi xgab zian? ⁹ ¿Conin ad
nawëegt gac, guial guiën loj bénragxuu guin ya:
“Ma benan xtolil perdon”, o guiën ya: “Bixche,
gules ni go'til loj, baguiaj”? ¹⁰ Per yan gulün lëjt
guial Bén guxhaal Dios rajpaman guialrniabee loj
guidxliuj guie din güünman dol ree perdon. Dxel
rëbaman loj xinragxuu guin:

¹¹ —Lüj rnin, bixche, baca' ni go'til loj baguiaj
lidxil.

¹² Loj hor guin gajc bayajc xin guin, bixchex
baca' ni go'tix loj, bariix lënü guin guidib loj gra
ree bén riga' yagaj. Abi' gra reeman badxaloj,
ruza't reeman Dios zagdxé, rëb reeman:

—Ni'qui tijb ad waguiaat ree zi'c naj ni cayguiaa
ree yan.

Rbejdx Jesús Leví
(Mt. 9:9-13; Lc. 5:27-32)

¹³ Dxel wej Jesús ro'nijsdoo Galilea zatijb. Dád zien ree bejn rdxin lod za'man persi rulüüman laa reeman xtiidx Dios. ¹⁴ Chi cadëdaman, baguiaaman Leví xi'ngaan Alfeo, zojbaman lod ruquijxaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

¹⁵ Dxel chi cayaw Jesús lidx Leví con zien ree bën ruquijx impuest në ree bën ad nabant zi'c rën Dios, gra reeman zojbnë Jesús xan mex con ree xbejnman, guial zinal zien ree bejn laaman. ¹⁶ Chi baguiaa ree bënfarisew con ree mextr rajc ley guial cayawnë Jesús bën guin ree, rëb reeman loj ree xbejnman:

—¿Chexc zeel rawnë xmextridi bën ruquijx ree impuest në ree bëndol?

¹⁷ Chi biguiejn Jesús ni rëb reeman, zeel rëbaman:

—Bënnadaan ree ad riaadxt reeman doctor, bënragxuu ree, laa reeman riaadx doctor. Ad zialtan par ree benza'c, zialan par ree bëndol din yayüjn reeman xgab por xtol reeman.

*Rniabdiidx reeman loj Jesús xcwent guialrba'n
(Mt. 9:14-17; Lc. 5:33-39)*

¹⁸ Lën ree dxej zii guba'n ree xbejn Waj bën ruroobnijs bejn ree, në ree bënfarisew. Abi' yu' ree bën gunabdiidx loj Jesús, rëb reeman:

—¿Chexc zeel ad rba'nt ree xbejnl zi'c rba'n ree xbejn Waj con ree bënfarisew?

¹⁹ Badxi' Jesús laan rëbaman:

—Wen, ¿zajc guiba'n ree biooz za' loj guialruxh-liaa ya la'tgaj za'në xin cuxhliaa guin laa reeman?

La'tgaj za'nëx laa reeman ad zajct guiba'n reeman. ²⁰ Per guidxin dxej chiquiedix loj reeman, abi' chi guidxin dxej guin dxel guiba'n reeman.

²¹ 'Achut bén rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin. ²² Ad rgu' tëët bejn vin cüb lën anfr yojx, din zaguixya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lën anfr cüb.

Rgui'ch ree xbejn Jesús trigo dxej raziiladx ree bén Israel
(Mt. 12:1-8; Lc. 6:1-5)

²³ Tijb dxej raziiladx ree bén Israel, cadéd Jesús con ree xbejnman loj guiniaa lod yu' trigo, abi' ree xbejnman guzuloj cagui'ch reeman trigo guin chi cadéd reeman. ²⁴ Dxel rëb ree bénfarisew loj Jesús:

—¿Chexc zeel rüjn ree xbejnl ni ad rayalt gac dxej raziiladx ree bejn?

²⁵ Per rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ²⁶ Tiamp ni goc Abiatar bixhioz rniabee gra ree bixhioz, guyu Davi lën xyadooro' Dios, gudawnë ree xcompniaraman guiadxtil ma nagle' abi' bixhiosi ree rayal gaw laa reen.

²⁷ Rëb tëë Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn. ²⁸ Abi' naj, guial najn Bén guxhaal Dios, ra'pan guialrniabee dxej raziiladx ree bejn.

3

Rayajc tijb xin naxü'n tibladyaa

(Mt. 12:9-14; Lc. 6:6-11)

¹ Tijb dxej guyu Jesús lën tijb yadoo. Lën yadoo guin za' tijb xin naxü'n tibladyaa. ² Abi' ree bën yu' lën yadoo guin rula'ch reeman Jesús din guidoon zayüjnman laax dxej raziiladx reeman ya, din gac gutedia' reeman Jesús. ³ Dxel rëb Jesús loj xin naxü'n yaa guin:

—Bisu, guzuj galay guin.

⁴ Abi' rëbaman loj ree bën guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtaman laaman?

Per ad badxi't reeman xtiidxaman. ⁵ Dxel rdxe'ch Jesús ruguiaaman loj gra reeman, dád guyunaya luxdooman guial ad guyënt reeman naya lasa' reeman. Zianz rëbaman loj xin guin:

—Basli yaal.

Abi' basli yaax, loj hor guin gajc bayajcan. ⁶ Chi baza ree bënfarisew guin, zianz baya'n reeman diidx con ree xbejn Herodes din gugüjt reeman Jesús.

Zien ree bejn riga' ro'nijsdoo

⁷ Per Jesús zë gajcaman ro'nijsdoo Galilea con ree xbejnman. Zien da't ree bën Galilea con ree bën Judea binal laaman, ⁸ në ree bën Jerusalén con ree bën Idumea, në ree bën zojb zatiblad ro' guiwro' Jordán, në ree bën Tiro con ree bën zojb niz Sidón. Dád zien ree bejn wej lod za' Jesús guial gogbee reeman ni rüjnman. ⁹ Zeel rëbaman loj ree xbejnman din guzujsin reeman tijb barcw

par laaman chitëe gutëe ree bën guin laaman.

¹⁰ Guial ma bayüjnman zien ree bejn, zeel rbig gra ree bënragxuu lojman din guqui' reeman laaman.

¹¹ Guiáad ree bën yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rëb reeman:

—¡Lüj naj Xi'n Dios!

¹² Per gunabeeman xindxab guin ree chitëe guiëb reex chu laaman.

Rbe Jesús chiptio'p ree apóstoles

(Mt. 10:1-4; Lc. 6:12-16)

¹³ Dxel wë'p Jesús tijb ruguia', abi' gurejdxaman gra ree bën guleman. Zianz wej reeman,

¹⁴ loj gra reeman gulejman chiptio'p reeman din su reeman con laaman zianczi guixhiaal tëeman laa reeman chigtie'ch reeman xtiidx Dios.

¹⁵ Abi' badëeman guialrniabee din yayüjn reeman bënragxuu ree yabëe tëe reeman xindxab luxdoo ree bejn. ¹⁶ Bën guie ree naj guidxiptio'p ree bën gule Jesús: Simón bën gulëëljman Bëd, ¹⁷ Jacob

con Waj, bën naj ree xi'n Zebedeo, gunee Jesús laa reeman Boanerges (rën guiëban, xi'n guziaaw);

¹⁸ në Andrejs, Felip, Tol, Matew, Tumajs con Jacob xi'n Alfeo, në Tadeo, nëtëe Simón bën bi'ch loj ree bën Cananistas, ¹⁹ con Judas Iscariote bën bayü Jesús.

Rëb ree bejn ca' Jesús xguialrniabee Beelzebú

(Mt. 12:22-32; Lc. 11:14-23; 12:10)

Chi gulox bacaabeeman laa reeman dxel badxinnëman laa reeman lod zojbaman. ²⁰ Dád zien ree bejn bido'p yagaj stijb, xt ni'quid bile't niajw Jesús con ree xbejnman. ²¹ Chi gogbee ree xfamil Jesús,

dxel bidxin reeman din yaca' reeman laaman guial rëb reeman guijcaman rajc.

²² Abi' ree mextr rajc ley bén zëed ree Jerusalén rëb reeman:

—Bén guin rabëë xindxab luxdoo ree bejn por xguialrniabee Beelzebú, xin rniabee ree xindxab.

²³ Dxel gurejdx Jesús laa reeman, rëbaman:

—¿Xhienaag yabëë satanás lasa' xindxab gajquix? ²⁴ Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman, ²⁵ ziangajc tijb famil, bal rdilnë lasa' reeman, nayob la' lasa' reeman. ²⁶ Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

²⁷ 'Abi' achut zajc chu' lidx tijb béngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

²⁸ 'Naj rni lojdi guial yu' perdon par gra dol ni rüjn bejn, yu' tée perdon par gra diidxguijdx ni rniee bejn chutëéz. ²⁹ Per bén guinieeguijdx xSprijt Dios, ad yu't dxej gacaman perdon, ma banijtaman loj Dios.

³⁰ Rëb Jesús zian guial rëb reeman yu' xsprijt xindxab luxdooman.

Xniaa Jesús con ree bijchaman

(Mt. 12:46-50; Lc. 8:19-21)

³¹ Hor guin bidxin xniaa Jesús con ree bijchaman yu' lod za'man, per ad bile't niu reeman zeel guxhaal reeman bén chignee laaman. ³² Dxel ree bén zojbnë laaman yagaj bagojn reeman laaman, rëb reeman:

—Laa xniaal con ree bijchil za' lule' guin cayguuil reeman lüj.

³³ Badxi' Jesús xtiidx reeman rëbaman:

—¿Chunin naj da nan con ree da bichan?

³⁴ Dxel baguiaaman bën zojb ree gadëd lod zobjaman, rëbaman:

—Bën guie ree naj da nan con ree da bichan,
³⁵ din graczi ree bën rüjn ni rën Dios, laa reeman naj da bichan, da zanan në da nan.

4

Xcwent bën rtie'ch bin (Mt. 13:1-9; Lc. 8:4-8)

¹ Zatijb dxej culüü Jesús xtiidx Dios ro'nijsdoo Galilea. Abi' guial dád benzien bido'p lod za'man zeel wë'paman loj tijb barcw yu' lojnijs guin, abi' gurejman lojn guiáad ree bën guin riga' reeman ro' nijs guin. ² Zien ree ni balüüman laa reeman, rüman laan loj reeman zi'c cwent, loj ree ni culüüman laa reeman rëbaman:

³ —Gol bacaagdiajg ni ganin lojdi: Tijb bejn briiman bigtie'chaman bin loj xguiniaaman. ⁴ Chi catie'chaman laan, ta'nan biajb lunejz abi' bidxin ree biguijn gudaw reeb laan. ⁵ Zata'nan biajb loj ree guiaj lod ad riga't zien yuj, abi' cari gulejnan guial ad zient yuj riga'. ⁶ Per chi gunan gubijdx, bigoolan abi' guial ad zro't liujn yu', gubidxan. ⁷ Zata'nan biajb loj ree yaquiëjch. Abi' chi guni'san, banidloj yaquiëjch guin laan, abi' ad cwat ladan. ⁸ Per zata'nan biajb loj yuj za'c, abi' dád gojcan, yu' ni cwa gajlbichii, yu' ni cwa gayojn yu' tää ni cwa tibgayuu.

⁹ Rëb tää Jesús loj reeman:

—Bén rën gucaagdiajg, gol bacaagdiajg.

*Chexc zeel rulüü Jesús con cwent ree
(Mt. 13:10-17; Lc. 8:9-10)*

¹⁰ Chi ma baya'nnë Jesús zata'nz ree bejn con guidxiptio'p ree xbejnman, dxel gunabdiidx reeman xhie rën guiëb cwent guin. ¹¹ Badxi'man laan rëbaman:

—Dios ma basa'n lëjt din chignia'di xhienaag naj xguialrniabeeman ni goc naguie'ch par lëjt, sa'n ree bén ad riladxt xguialrniabeeman, con ganaxzi ree cwent naj guial gulün laa reeman. ¹² Din majsi rani loj reeman, per ad zuguaat reeman, majsi riguiëjn reeman, per ad zignia't reeman chitëë yayejc reeman loj Dios abi' güünman perdon xtol reeman.

*Rusignia' Jesús xcwent bén rtie'ch bin
(Mt. 13:18-23; Lc. 8:11-15)*

¹³ Abi' rëb Jesús loj reeman:

—¿Nid rignia'di ya xhie rën guiëb cwent guin? ¿Xhieza naag chignia'di gra ni ganin lojdi? ¹⁴ Bén gutie'ch bin guin, laaman naj zi'c bén rtie'ch xtiidx Dios. ¹⁵ Bin biajb lunejz, naj zi'c ree bén riguiëjn xtiidx Dios, per rdxin gajc xindxab rquiedix laan luxdoo reeman. ¹⁶ Yu' ree bén naj zi'c bin biajb loj ree guiaj. Riguiëjn reeman xtiidx Dios abi' dád nix ru luxdoo reeman riguiëjn reeman laan. ¹⁷ Per guial naj reeman zi'c tijb cwaan ni ad yu't zro' liuj, chi rzagdiaj reeman o chi rzunal ree bejn laa reeman din güün reeman laa reeman ni mal por xtiidx Dios, laa rusa'n gajc reeman ni riladx reeman. ¹⁸ Yu' tëë ree bén naj zi'c bin ni biajb loj yaquiëjch. Riguiëjn reeman xtiidx Dios, ¹⁹ per

ru reeman xgab por ree ni riga' loj guidxliuj guie. Rusquiee guialnaza'c laa reeman rën reeman gap reeman graloj. Abi' guial yu' xgab guin guijc reeman, zianz rucwëez rucaagdiajg reeman xtiidx Dios, abi' achet sirv rüjn ni rucaagdiajg reeman. ²⁰ Per yu' ree bën naj zi'c bin biajb loj yuj zagdx, ridxga' reeman laan con guidib luxdoo reeman. Rüjn reeman zi'c rën Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

Achet ni naguie'ch yu'

(Lc. 8:16-18)

²¹ Abi' rëb Jesús loj reeman:

—Achut bën ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib. ²² Din achet ni naguie'ch yu' ni ad zaguiet ad yu' tëet ni ralan ni ad zagbeet bejn. ²³ Bën rën gucaagdiajg, gol bacaagdiajg.

²⁴ Rëb tëe Jesús:

—Gol been xgab por ree diidx ni caguiejndi. Bal ridxga'di xtiidx Dios, mazri gustëdguienman lëjt. ²⁵ Din bën ma rignia' xtiidx Dios, chignia'man mazri. Per bën ad rignia't, xt ta'n ni rignia'man ad zignia'traman.

Xcwent guial rni's bin

²⁶ Rëb tëe Jesús loj reeman:

—Xguialrniabee Dios naj zi'c rzajc bën rxübin loj xguiniaaman. ²⁷ Din majsi naga'yëjsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan. ²⁸ Din yuj guin gajc rusni's laan, yaløj rliejnan najn tijb gui'xhdoo, dxel ririin dojn, zianz

rtia ladan. ²⁹ Chi ma gojc reen dxel raru' reen guial ma bidxin tiamp yado'p reen.

Xcwent xhaj moxtajs

(Mt. 13:31-32; Lc. 13:18-19)

³⁰ Rëb tëë Jesús:

—¿Xhienaag ganin naj xguialrniabee Dios, o xhienaag gün diidx lojdi din chignia'di xhienaag naj xguialrniabeeman? ³¹ Rnin lojdi guial xguialrniabee Dios naj zi'c naj xhaj moxtajs. Chi rxübin reeman laan. Laan naj ni mazri ni dobëz loj gra ree bin yu' loj guidxliuj. ³² Per chi ma guxübin reeman laan, rni'san rajcan mazri narooob loj gra ree cwaan, xt rajc rüjn xguixbitia's ree biguijn xidxan.

Balüü Jesús con ganax cwent

(Mt. 13:34-35)

³³ Balüü Jesús laa reeman xtiidx Dios con ganax-czi cwent zi'c naj ree ni ma beman, xt lodzi bignia' reeman. ³⁴ Ad rulüütaman laa reeman zezi, bal id zulüüman con cwent. Per chi ma za'man con ree xbejnman dxel rusignia'man laa reeman zagdxe xhie rën guiëb ree ni rëbaman.

Racwëëz Jesús bidoxh

(Mt. 8:23-27; Lc. 8:22-25)

³⁵ Dxej zii, chi gure guiaal, rëb Jesús loj ree xbejnman:

—Yo' ree zatiblad ro' nijs guin.

³⁶ Dxel basa'n reeman bën riga' ree yagaj, wë'p reeman loj barcw ni yu' Jesús zinë reeman laaman con ree barcw ren. ³⁷ Dxel brii bidoxh loj nijs guin, xt guzuloj cadxa nijs loj barcw guin. ³⁸ Per Jesús naga'yëjsaman loj barcw guin tijb luar naj xijchan,

nucuugaman tijb almoad. Dxel bacwëen reeman laaman rëb reeman:

—¡Mextr! ¿Nid yu'l xgab ya? ¡Ma cayzëeb ree xan nijs!

³⁹ Abi' bixche Jesús, bacwëezaman bidoxh guin rëb tëëman loj nijs guin:

—¡Bacwëöz, bayajcdxe!

Dxel bayajcdxe bi guin con nijs guin. ⁴⁰ Zianz rëb Jesús loj reeman:

—¿Chexc zeel rdxebidi? ¿Gadzidi chililadx naj ya?

⁴¹ Per laa reeman dád bidxeb reeman abi' rniab-diidx loj lasa' reeman:

—¿Chu bën guin zeel xt bi con nijs ruzoob xti-idxaman?

5

Rayijn Jesús tijb xin yu' xindxab luxdoo

(Mt. 8:28-34; Lc. 8:26-39)

¹ Chi badxin Jesús con ree xbejnman zatiblad ro' nijsdoo guin, xdajn ree bën Gadara, ² baguiajtzi Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa, ³ guial nabanx ni. Achutczi rajc rixhii laax ni'qui con caden. ⁴ Zien volt ma guxhii reeman yaax në guia'x con caden, per rüjngajquix gan rurooxix laan. Achut rüjn laax gan. ⁵ Dxejz guiaal rizax niz dajn con lað ree baa, rbixdiajx rguilguijdx laagajquix con guiaj. ⁶ Zijtri baguiaax Jesús, baxüünx bigchaaglojx laaman abi' bazuxibix lojman. ⁷ Zianz guneex rejs rëbix:

—¿Xhie rënl con naj Jesús, Xi'n Dios yu' xanyabaa? Rniaaban lojl ad gusagzil naj.

⁸ Rëbix zian, guial cayëb Jesús lojx:

—¡Xindxab, barii luxdoo xin guin!

⁹ Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

¹⁰ Abi' rëbix lojman chitëë guixhiaalaman xindxab guin ree lood ren.

¹¹ Abi' gajxh yagaj riga' zien ree cüch cayaw reeb. ¹² Zianz rëb ree xindxab guin loj Jesús:

—Guxhaal dunujn lod za' ree cüch guin din yadxu'n lën reeb.

¹³ Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb. ¹⁴ Guiáad ree bén cayajp laa reeb, baxüün reeman bicojn reeman luguiedx në ree dajn abi' zien ree bejn wej biquiaa ni goc.

¹⁵ Chi bidxin reeman lod za' Jesús, baguiaa reeman xin barii xindxab guin ree luxdoo, zojbix najcw xabix, ma badëdguienx. Abi' bidxeb reeman.

¹⁶ Guiáad ree bén baguiaa gra ni goc con xin guin, në con ree cüch guin, be reeman diidx loj ree bén bidxin. ¹⁷ Dxel guzuloj rëb reeman loj Jesús din yazaman niz ladx reeman.

¹⁸ Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman. ¹⁹ Per ad cwëjbt Jesús, rëbaman:

—Baguiaj lidxil, bignaj xfamilil, biguie diidx loj reeman gra ni ma been Dios por lüj, xhie tëë naag bayaman lüj.

²⁰ Dxel ziax, guzuloj rëbix loj ree bën zojb niz Decápolis gra ni been Dios por laax, abi' graczi reeman badxaloj.

*Rayajc xi'n Jairo në béngunaa bagaal xab Jesús
(Mt. 9:18-26; Lc. 8:40-56)*

²¹ Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman. ²² Dxel bidxin tijb bën rniabee lën tijb xyadoo ree bën Israel, laman Jairo. Chi baguiaaman Jesús, bazuxibaman lojman, ²³ abi' guzajcaman laaman liaadx, rëbaman:

—Ma cayëjt da xi'nan. Yo'sii din gudxiib yaal guijquim din yayajquim din guibanm.

²⁴ Zinët Jesús bën guin, dád zien bejn zinal laaman xt rixa't reeman laaman. ²⁵ Loj graczi reeman no'ch tijb béngunaa, ma gojc chiptio'p ijz ragxuuman ryajbaman rejn. ²⁶ Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman. ²⁷ Chi biguejnman gra ni rüjn Jesús, gudëdaman lad ree bën guin, gubigaman niz xijchaman dxel bagaalaman xabaman. ²⁸ Guial gunaladxaman: “Gugalzan xabaman, ma bayajc gajcan.” ²⁹ Loj hor zii gajc gulëjz biajbaman rejn, abi' gogbeeman ma bayajcaman. ³⁰ Laa gogbee gajc Jesús guial yu' chu ma bayajc por xguialrniabeeman, abi' badxi' lojman loj ree bën guin dxel gunabdiidxaman, rëbaman:

—¿Chu baqui' da xaban?

³¹ Abi' rëb ree xbejnman lojman:

—Awa ruguiaal xt rixa't reeman lüj guiáad lüj rniabdiidxil chu baqui' xabil. ³² Per Jesús ruguiaaman gra lad din guguaaman chu baqui' laaman.

³³ Abi' guidib rnij béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman.

³⁴ Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdxe. Ma bayajquil guialguijdx ni goquil.

³⁵ Sta canee Jesús zian, chi bidxin ree bén guza lidx Jairo, rëb reeman loj Jairo:

—Ma güjt xi'nl. Ad ruslenril mextr guin mazri.

³⁶ Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

³⁷ Ad cwëjbt Jesús ninal gra ree bén riga' laaman, Bëdzi, con Jacob, con Waj bijch Jacob. ³⁸ Chi bidxin reeman lidxaman, baguiaa Jesús cayajc naquie' guial roon rbixdiaj reeman. ³⁹ Dxel guyuman lënü abi' rëbaman loj reeman:

—¿Chexc zeel roon rbixdiajdi? Ad güjttim, naga'yëjsim.

⁴⁰ Per baze' reeman laaman. Dxel gunabeeman barii gra reeman, zianz binëman xdadim con xni-aam con ree bén zinëman, lod naga' bindo guin.

⁴¹ Dxel gunaazaman yaam rëbaman:

—Talita, cumi —Rën guiëban: Lüj rnin, bindoo, bixche.

⁴² Loj hor ziigajc bixchem guzuloj cazam. Yu'm chiptio'p ijz. Abi' dád badxa loj ree bén riga'. ⁴³ Per gunabee Jesús laa reeman chitëë chu loj guiëb

reeman ni goc, gunabee tēēman gudēēd reeman ni gawim.

6

Radxin Jesús Nazaret

(Mt. 13:53-58; Lc. 4:16-30)

¹ Baza Jesús yagaj, badxin ladxaman con ree xbejnman. ² Chi bidxin dxej raziiladx ree bejn, guzuloj culüüman bejn ree lēn yadoo. Abi' gra ree bēn cucaagdiajg dād badxa loj reeman ni rnieeman, abi' rēb reeman:

—¿Ban basiid bēn guin gra ni rnieeman? ¿Ban gulēēman guialrignia' guin abi' chu badēē guialrniabee zeel rüjnman milagr guin ree?

³ ¿Nid laaman naj bēn carpinter ya, xi'n Li abi' ree bijchaman naj Jacob, Xiēb, Judas, nē Simón? Guiáad ree bizanman zojb luguiedx guie.

Abi' ad bidxga't reeman Jesús. ⁴ Per rēbaman loj reeman:

—Guidibczi rajp reeman respejt tijb bēn rudēē xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

⁵ Ad bile't nüjn Jesús zien ree milagr yagaj. Bēlzi ree bēnragxuu bayüjnman, badxiib yaaman guijc reeman. ⁶ Dād badxalojman guial ad bililadxt reeman laaman. Dxel zēman guiedx naj ree gajxh, ziglüüman bejn ree.

Rxhiaal Jesús guidxiptio'p ree xbejnman chigliüü reeman xtiidx Dios

(Mt. 10:5-15; Lc. 9:1-6)

⁷ Dxel gurejdx Jesús guidxiptio'p ree xbejnman, abi' guxhaalaman tio'p gaj reeman. Badēēman

gualrniabee loj reeman din yabëë reeman xindxab ree luxdoo ree bejn. ⁸ Dxel gunabeeman din achetczi chinë reeman par runejz, ni'qui guijxh, ni'qui gualraw, ni'qui milia, tijbzi yagrliadx reeman, ⁹ con xgurëch reeman, con tijbzi lajd najcw reeman. ¹⁰ Dxel rëbaman loj reeman:

—Yu lod guidxindi, tijbzi yagaj yaya'ndi xt guidxin dxej yazadi luguiedx guin. ¹¹ Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxijp guxyuj guia'di zi'c sen gual ad rënt reeman guzoob reeman diidx. Din naj rni lojdi, gual dxej ni yadëed ree bejn cwent loj Dios mazri casti narooob yayal reeman gual loj ree bën Sodoma në Gomorra.

¹² Zianz brii reeman ziguedx reeman loj ree bejn gual rayal yayüjn reeman xgab por xtol reeman. ¹³ Abi' rabëë reeman zien ree xindxab luxdoo ree bejn, zien tëë ree bënragxuu gudëëb reeman sejt, abi' bayüjn reeman laa reeman.

Güjt Waj bën baroobnijs bejn ree

(Mt. 14:1-12; Lc. 9:7-9)

¹⁴ Chi biguiejn rey Herodes ni rüjn Jesús gual ruza't ree bejn laaman guidibczi, rëb reeman:

—Waj, bën baroobnijs bejn ree ma baban, zeel rajpaman gualrniabee rüjnman milagr ree.

¹⁵ Per yu' reeman rëb:

—Elíasan, bën rudëë xtiidx Dios loj ree bejn.

Yu'za reeman rëb:

—Tijb bën rudëë xtiidx Dios loj ree bejnan lasa' ree bën gocli.

16 Chi biguiejn Herodes rëb reeman zian, rëbaman:

—Wajn, xin gunabeen biru' yëjn, laaxan ma baban yan.

17 Rëb Herodes guin zian din laagajcaman gunabee gunaaz reeman Waj, abi' badxe'man laaman ladxguuib por Herodías. Herodías naj xbéngunaa Filip bijch Herodes. Per Herodes cwa'man Herodías. 18 Abi' guial rëb Waj loj Herodes:

—Ad laat tia' xbéngunaa bijchil.

19 Zeel bidxe'ch Herodías Waj, guyënman nugüjtaman laaman. Per ad riletan, 20 din rdxeß Herodes guial ragbeeman rüjn Waj ni rën Dios, rüjn tääman zi'c rayal, zeel ad cwëjbtaman xhie nüjnnë Herodías Waj. Majsi ad ragbeet Herodes xhie güünman por ni rëb Waj lojman, per ruladxaman gucaagdiajgaman ni rnieeman.

21 Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bën rniabee ree në par ree bën rniabee ree suldad nëtëë ree bën zojbloj niz Galilea. 22 Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojm:

—Gunab ni rëntzil, naj gune laan.

23 Xt badëë xtiidxaman gudëëman ni guini-abtzim, majsi garol ni rajpaman. 24 Dxel bariim bignabdiidx loj xniaam, rëbim:

—¿Xhie ganaaban?

Badxi'man laan rëbaman:

—Gunab guijc Waj bën ruroobnijs bejn ree.

²⁵ Laa bayugajquim lod za' rey Herodes, rëbim lojman:

—Yan gajc rënan guneel guijs Waj, bën ruroob-nijs bejn ree, guneelan loj tijb pliajt.

²⁶ Dád guyu naya Herodes, per mal badëed xti-idxaman guidib loj ree bën riga', zeel ad bile't nibexuuman nudëëman ni gunabim. ²⁷ Dxel gunabee Herodes tijb suldad din chica'x guijs Waj. ²⁸ Zianz wej suldad guin lën ladxguiib guin, gutü'x guijs Waj badxe'xan loj pliajt binëxan lojm. Dxel bayü loj xniaamin.

²⁹ Chi gogbee ree xbejn Waj guial ma güjtaman, baca' reeman xcuerpaman persi biquie'ch reeman laaman.

Ruyaan Jesús gaay mil bejn

(Mt. 14:13-21; Lc. 9:10-17; Jn.6:1-14)

³⁰ Chi bayejc ree xi apóstoles Jesús, be reeman diidx lojman gra ni been reeman në ni balüü reeman. ³¹ Dxel rëb Jesús loj reeman:

—Gol guda, yo' dunujz ree niz lod achut bejn zojb din yaziiladx ree ta'n.

Rëbaman zian guial dád zien ree bën zia zien tëë ree bën zëëd, xt ni'qui guial gaw reeman ad rile'tan.

³² Dxel Jesús con ree bën naj ree apóstoles zë reeman loj barcw tijb luar lod achut zojb. ³³ Per dád zien ree bejn baguiaa guial zë reeman, abi' bayünbee reeman laa reeman zeel zien ree bejn brii luguiedx guin ree ruxüün reeman, abi' yalojl laa reeman bidxin lod zë Jesús con ree xbejnman.

³⁴ Chi baguiajt Jesús loj barcw guin, baguiaaman bën guixiuj riga' yagaj, abi' bayaman laa reeman

guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman. ³⁵ Chi ma gudxe, gubig ree xbejnman, rëb reeman lojman:

—Ma gudxe yan, abi' achut bejn zojb niz guie.

³⁶ Gündx loj ree bén guin din che reeman ranch ree në ree guiedx ni riga' gajxh chisii xhienin gaw reeman.

³⁷ Per rëb Jesús loj reeman:

—Lëjt gol badëed ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bén guin, zi'ct ni rüjn bejn gan loj tio'p gayuu dxej.

³⁸ Abi' rëb Jesús loj reeman:

—¿Bël guiadxtil ca'di? Gol baguiaa don.

Chi baguiaa reeman, dxel rëb reeman:

—Gaay guiadxtil con zatio'p bëjl.

³⁹ Dxel gunabeeman din cwe tibcwaa gaj reeman loj guixya'. ⁴⁰ Zianz gurej reeman zian, yu' lod gure tibgayuu reeman, yu' lod gure tü'pchii reeman. ⁴¹ Abi' cwa' Jesús guigaay guiadxtil guin con grop bëjl guin. Dxel gules lojman xanyabaa, badëëman quixtëe loj Dios, gula'man guiadxtil guin badëëman loj ree xbejnman persi gudi's reeman laan loj ree bén riga', gudi's tëëman grop bëjl guin loj gra reeman. ⁴² Graczi reeman gudaw xt bigdxinladx reeman, ⁴³ abi' staczi bacha reeman chiptio'p dxüm guiadxtil laay con bëjl ni baya'n. ⁴⁴ Loj ree bén gudaw no'ch cost gaay mil xinguaaw.

*Rza Jesús loj nijs
(Mt. 14:22-27; Jn. 6:16-21)*

⁴⁵ Dxel gunabee Jesús guyu ree xbejnman loj barcw din tédgaj reeman stiblad ro' nijs par guidxin reeman Betsaida, la'tgaj cuzaadiidxnëman benzien guin ree. ⁴⁶ Chi gulox bazaadiidxnëman laa reeman, wejman guiyc tijb guia', persi gurejdx gunabaman Dios. ⁴⁷ Chi ma cabej guiaal, ma yu' barcw guin galay nijs guiáad Jesús baya'n xtijbzaman guiyc guia' guin. ⁴⁸ Dxel baguiaaman dád cazagdiaj ree xbejnman cusa reeman barcw guin guial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, beenman zi'c bën tédnejz. ⁴⁹ Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman. ⁵⁰ Dád cadxeb reeman por ni cugiaaa reeman. Per guneenë Jesús laa reeman rëbaman:

—¡Gol bagu' luxdoodi, ad bal rdxebidi, najn!

⁵¹ Dxel guyuman loj barcw guin, zianz gulëjz bi guin. Guiáad laa reeman dád badxa loj reeman, ⁵² din nayaaw xquiarguiejn reeman, abi' ad bignia't reeman milagr ni beenman con guiadxtil guin ree.

*Rayüjn Jesús bénragxuu ree Genesaret
(Mt. 14:34-36)*

⁵³ Chi ma gudëd reeman lojnijs guin bidxin reeman xdajn ree bën Genesaret, yagaj guxhii reeman barcw guin ro' nijs. ⁵⁴ Naabzi baguiajt reeman loj barcw guin, laa bayünbee gajc ree bejn Jesús. ⁵⁵ Abi' gutie'ch reeman diidx guidib niz yagaj. Dxel guzuloj zinë ree bejn bénragxuu ree lod riguieljntzi reeman za' Jesús. ⁵⁶ Bantëëz

zëman, majsi guiedx narooob o guiedx dobëz o ranch ree, rguijxh reeman bënragxuu guin ree niz lod tëdaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bën bagaal xabaman bayajc.

7

Ni rüjn persi rüjn bejn dol

(Mt. 15:1-20)

¹ Tijb dxej, tio'p choon ree bënfarisew con ree mextr rajc ley, bën guza ree Jerusalén, bibig reeman loj Jesús. ² Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman. ³ (Din bënfarisew në gra ree bën Israel zinaldx'i'ch reeman xcostumbr xbéngulal reeman guial ad zajct gaw reeman bal id reeman gunaa zi'c naj costumbr guin. ⁴ Në chi raza reeman luguia', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhienaag quiib reeman re, con vajs, con ree trast guiib, në xloon reeman riguiib reeman.) ⁵ Zeel bënfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejnl zi'c naj xcostumbr dux béngulal ree? ¿Chexc zeel raw reeman zianzi?

⁶ Dxel rëb Jesús loj reeman:

—¡Bën rusquiee!, waliqui ni gunee Isaías por lëjt, bën badëë xtiidx Dios loj ree bejn, chi bacaaman: Bën guie ree, rëbzi reeman guial rën da't reeman naj,
per ad rënt reeman naj con guidib luxdoo reeman.

⁷ Xlia'czi rën da't reeman naj,
abi' rulüü reeman bejn ree ganaxzi ni rbëëguijc
ree bénguidxliuj.

⁸ Yan, rusa'ndi xtiidx Dios tibladi persi zinalidi
xcostumbr ree bénguidxliuj.

⁹ Rëb tëë Jesús loj reeman:

—Par chitëë nit xcostumbridi zeel rusa'ndi xti-
idx Dios tibladi. ¹⁰ Rëb Moisejs: “Gojp respejt
xdadil con xniaal”, abi’ “Bén guzaal diidxmal guijc
xdad o xniaa, rayal guiëtaman.” ¹¹ Per lëjt rëbidi
guial zile' guiëb bejn loj xDadaman o xniaaman:
“Ad zajct günan lüj yudar, din gra ni ra'pan naj
Corbán” (Corbán rën guiëb gran naj par Dios).
¹² Rëbidi, bén guiëb zian, ad zile'tri güün xdad
xniaaman yudar. ¹³ Abi' rbëëladxidi xtiidx Dios
persi zinal xcostumbridi ni rulüü lasa'di, në zien
ree ni ren rüjndi lasa' ree ni guin.

¹⁴ Dxel gurejdx Jesús bén zien guin ree, rëbaman:

—Gol bacaagdiajg gradi gol bignia' tëë ni ganin:

¹⁵ Ad ni rawt bejn rüjn persi rüjnman dol. Ni ririi
ro'man në ni rüjnman, laan rüjn persi rüjnman dol.

¹⁶ ¡Bén rën gucaagdiajg, gol bacaagdiajg!

¹⁷ Chi baza Jesús lod za' ree bén guin bayu-
man lënü, dxel gunabdiidx ree xbejnman xhie rën
guiëb ni rëbaman. ¹⁸ Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi
ya guial ad ni rawt bejn rüjn persi rüjnman dol,

¹⁹ din ni raw bejn ad rejtan luxdooman, rejn
lënman, abi' rariin?

Zian basignia'man guial ad rüjnt bejn dol por ni
rawzaman. ²⁰ Rëbaman:

—Ni ririi ro' bejn në ni rüjnman, laan rüjn persi
rüjnman dol. ²¹ Din guijc bejn zëed gralox gxab mal,

gual rüjn ni dxuudx, gualgubaan, gualrugüjt lasa', ²² gual rzunë bəngunaa ren o xinguaaw ren, gualrzëëbladx xieen ben ren, gual rüjn ni mal, gualrusquiee, gualrajp vijs, gualnadédloj, gualrbëë xtiidx bejn, gualrüjn benro', nē gual rüjn ni ad rayalt. ²³ Graczi ree ni guin zëed guijc bejn, abi' laan rüjn persi rüjnman dol.

Rayajc xi'n tijb bən Sirofenicia

(Mt. 15:21-28)

²⁴ Chi baza Jesús niz yagaj, zēman niz Tiro nē Sidón. Dxel guyuman tijb lēnū gual ad guyəntaman niagbee ree bejn, per ad gojct nuquie'ch lojman. ²⁵ Din gogbee gajc xniaa tijb bindoo yu' xindxab luxdoo. Abi' wej xniaam lod za' Jesús zianz bazuxibaman lojman. ²⁶ Ad najtaman bən Israel, najman bən Sirofenicia. Dxel guzajcaman liaadx loj Jesús din yabëəman xindxab guin luxdoo bindoo guin. ²⁷ Per rēb Jesús lojman:

—Badëədxgaj mod gaw yaloj ree xindoo, din ad rayalt chiquied bejn guiadxtil loj xi'nman din gudëəman laan gaw ree bē'cw.

²⁸ Badxi' bən guinan rēbaman:

—Waliquil, Dad, per nē ree bē'cw raw xguiadxtil laay reem ni ryajb xan mex.

²⁹ Dxel rēb Jesús:

—Laaqui guneel. Ma zajc yaguiajl, ma barii xindxab guin luxdoo xi'nl.

³⁰ Chi badxin lidx bən guin, baguiaaman laa bindo guin naga' loj loon, ma barii xindxab guin luxdoom.

Bayajc tijb bən nacwa't ad rniece tēətaman zagdx

³¹ Baza Jesús niz Tiro, gudëdaman niz Sidón, në loj ree guiedx riga' Decápolis abi' bidxinman ro'nijsdoo Galilea. ³² Ni bidxinnë reeman tijb xinguaaw nacwa'tix ad rajc tëet rnieex zagdxë. Abi' rëb reeman loj Jesús din gudxiib yaaman guijquix. ³³ Zianz binë Jesús laax tibladd, badxe' xbacwënman lën guidiajguix, abi' con xhiejnman bagaalaman lüdxix. ³⁴ Dxel gules lojman xanyabaa, bana-
jladxaman, rëbaman:

—¡Efata! —rën guiëban: ¡Baxal!

³⁵ Loj hor zii gajc baxal ree guidiajg xin guin, baban lüdxix dxel guzuloj caneex zagdxë. ³⁶ Dxel gunabee Jesús laa reeman chitëë chu loj guiëb reeman ni goc. Per guial rëbaman zian, mazri rü reeman laan loj ree bejn. ³⁷ Dád badxa loj reeman rëb reeman:

—Xi zagdxë naj gra ree ni rüjnman, xt rüjnman persi riguejn ree bën nacwa't, abi' ree bengop rniee reeman.

8

Ruyaan Jesús tajp mil bejn (Mt. 15:32-39)

¹ Tijb dxej bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

² —Rayan bën guin ree din ma gojc choon dxej nadxu'në' reeman guie, abi' ad ca't ni gaw reeman. ³ Abi' bal yaxhalan laa reeman lidx reeman sin guialraw, dool yadaj reeman lunejz, din yu' reeman zëed zijt.

⁴ Dxel rëb ree xbejnman:

—Per, ¿ban guin yuca'n ni gaw ree b́en guin, achutczi bejn zojb niz guie?

⁵ Dxel gunabdiidxaman loj reeman ŕebaman:

—¿B́el guiadxtil ca'di?

Abi' ŕeb reeman:

—Gajdxan.

⁶ Dxel gunabeeman gurej ree b́en guin luyuj. Zianz cwa'man guigajdx guiadxtil guin, bad́eeman quixt́e loj Dios, abi' gula'man laa reen bad́e loj ree xbejnman persi gudi's reeman laa reen loj gra ree b́en guin. ⁷ Ńegajc tio'p choon ree b́ejldoo ca' reeman, abi' bad́eeman quixt́e loj Dios dxel gunabeeman gudi's reeman ńe laa reeb loj ree b́en guin. ⁸ Graczi reeman gudaw xt bigdxinladx reeman, abi' staczi bacha reeman gajdx dx́um guiadxtil laay ńe b́ejl ni baya'n. ⁹ B́en gudaw ree naj reeman cost tajp mil. Chi gulox gudaw reeman, dxel bazaadiidxńe Jeśus laa reeman. ¹⁰ Zianz guyuman loj barcw con ree xbejnman źe reeman niz Dalmanuta.

*Rniab ree b́enfarisew tijb milagr loj Jeśus
(Mt. 16:1-4; Lc. 12:54-56)*

¹¹ Dxel bidxin ree b́enfarisew, guzuloj cadildiidxńe reeman Jeśus, abi' par ǵuun reeman laaman prueb, gunab reeman ǵuunman tijb milagr zi'c tijb sen guial por Dios źeédaman. ¹² Dxel banajladx Jeśus, ŕebaman:

—¿Chexc zeel ŕendi ǵunan tijb milagr? Diidxli ganin, achetczi milagr ǵunan guguaadi.

¹³ Dxel basa'nman laa reeman, bayuman loj barcw zatijb, zigńe ree xbejnman stiblad ro' nijs guin.

*Xlevadur ree bénfarisew**(Mt. 16: 5-12)*

¹⁴ Bayanladx ree xbejn Jesús ninë reeman guialraw, tijbzi guidxtil ca' reeman loj barcw guin.

¹⁵ Abi' chi rëbaman loj reeman:

—Gol gojp cudad con xlevadur ree bénfarisew në xlevadur Herodes.

¹⁶ Dxel guzuloj rëb loj lasa' reeman:

—Naman duloj ree zian guial ad naca't ree guidxtil.

¹⁷ Abi' gogbee Jesús ni canee reeman, zianz rëbaman:

—¿Chexc zeel rëbidi guial ad ca'tidi guidxtil? ¿Staczi ad rignia'tidi ya? ¿Sta nayaaw xquiar-guiejndi ya? ¹⁸ Yu' guiaalojdi per rulüü ad ruguiaatidi, yu' guidiajguidi per rulüü ad rigujejntidi. ¿Nid rusaaladxidi ya? ¹⁹ Chi gudi'san gaay guidxtil loj gaay mil bejn, ¿bël dxüm ni laay bato'pidi?

Badxi' reeman laan rëb reeman:

—Chiptio'pan.

²⁰ Dxel rëbaman:

—Laadx chi gudi'san gajdx guidxtil loj tajp mil bejn, ¿bël dxüm guidxa baca'di?

Badxi' reeman laan rëb reeman:

—Gajdxan.

²¹ Dxel rëbaman:

—¿Staczi ad waygnia'tidi ya?

Rayün Jesús tijb Bén ad ranit loj

²² Chi bidxin Jesús guiedx Betsaida con ree xbejnman. Binë ree bejn tijb Bén ad ranit loj, rëb reeman loj Jesús din gugaalaman guiaalojman.

²³ Dxel gunaaz Jesús yaaman gulëëman laaman

luguiedx guin, abi' gudëeb xhiejnman guiaalojman, baqui'man guiaalojman. Zianz gunabdiidxaman rëbaman:

—¿Rajc ruguiaal ta'n ya?

²⁴ Dxel guzuloj cuguaaman, abi' rëbaman:

—Ruguan bejn ree, per rulüü naj reeman zi'c yag ni caza.

²⁵ Dxel bagaal Jesús guiaalojman stijb, abi' rëbaman lojman din guguaadxijchaman, dxel guzuloj cuguaaman zagdxë, naynidxuj ma ruguaaman gra. ²⁶ Abi' baxhaal Jesús laaman lidxaman, rëbaman:

—Ad yayul luguiedx guin achu tëë loj guiëbil xhienaag bayajc lojl.

*Rëb Bëd guial Jesús naj Cristo
(Mt. 16:13-20; Lc. 9:18-21)*

²⁷ Bazanë ree xbejn Jesús niz Galilea, wej reeman guiedx riga' ree Cesarea de Filipino. Chi zë reeman lunejz gunabdiidx Jesús loj ree xbejnman, rëbaman:

—¿Chu rëb ree bejn najn?

²⁸ Badxi' reeman laan rëb reeman:

—Yu' reeman rëb lüj naj Waj bën baroobnijs bejn ree, yu'za reeman rëb lüj naj Elías, yu' tëë reeman rëb lüj naj tijb ree bën badëed xtiidx Dios loj ree bejn gocli.

²⁹ Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo.

³⁰ Per rëb Jesús loj reeman achu loj guiëb reeman zian.

Rugojn Jesús guiëtaman
(Mt. 16:21-28; Lc. 9:22-27)

³¹ Guzuloj Jesús rëb loj ree xbejnman:

—Rayal sagdiaj da't Bén guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

³² Zagdxe basignia'man laa reeman. Dxel gulëëcaan Bëd laaman, rëbaman lojman chitëë rëbraman zian. ³³ Per badxi' lojman baguiaa ree xbejnman, dxel gudilëman Bëd rëbaman:

—¡Bisüd lon, Satanás!, din ad por Diost zëed ree xgab ni rüjnl, rüjnl zi'c naj xixgab bénguidxliuj.

³⁴ Dxel gurejdx ree xbejn Jesús con ree bén riga' yagaj, abi' rëbaman loj reeman:

—Bal chu rën gac da bejnan, ad rayalt güünman zi'c naj xixgabaman. Siibnejzaman guialzi ni tëdzaman abi' guidnalaman naj. ³⁵ Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj në por da diidxan, zajpaman guialnaban tiblayaa con Dios. ³⁶ ¿Xhie gan güün bejn gapaman gra ni yu' loj guidxliuj bal canijtaman loj Dios? ³⁷ Din ad zile't sii bejn xguialnabanman xanyabaa. ³⁸ Din bén yatunë naj në da diidxan niz loj ree bëndol Bén ad zinalt ree xnejz Dios, bén riga' ree yan, ziangajc naj, najn Bén guxhaal Dios, yatunë'n laaman chi guialan con xguialrniabee da Dadan con ree xianjlaman.

9

¹ Rëb tëë Jesús loj reeman:

—Diidxiczi ganin, yu' ree b́en za' guie, ad źejtt xt guguaa reeman gui't xgualrniabee Dios.

Bidxaa Jesús loj choon ree xbejnman

(Mt. 17:1-13; Lc. 9:28-36)

² Chi goc xho'p dxej, wej Jesús tijb ruguia'ya, binëman Béd, Jacob con Waj. Yagaj bidxaa Jesús niz loj reeman. ³ Balaa xabaman bacha', gojcan naquichbëj, achutczi rguuib lajd zian loj guidxliuj guie. ⁴ Dxel baguiaa reeman Elías nê Moisejs cayünë reeman Jesús diidx. ⁵ Abi' rëb Béd lojman:

—Mextr, ¿zagdxen nadxu'n guie! Yaguieenan choon ranch, tijban par lüj, tijban par Moisejs, zatijban par Elías.

⁶ Per ad ragbeet Béd xhienin caneeman guial dád bidxeb reeman. ⁷ Loj hor guin biguiajt tijb zaj beenan bala guijc reeman, abi' loj zaj guin biguien cha' bejn rëbaman:

—Bén guie naj da Xi'nan, b́en rën da'tan, gol bazoob xtiidxaman.

⁸ Abi' chi baguiaa reeman gadëd lod za' reeman achutri za'në Jesús, tijbzi laaman za' yagaj. ⁹ La'tgaj cayguiajt reeman ruguia' guin, rëb Jesús loj reeman chitëë chu loj guiëb reeman ni baguiaa reeman, xt yaban Bén guxhaal Dios. ¹⁰ Abi' laaz reeman ragbee ni baguiaa reeman, rniabdiidx tëë loj lasa' reeman xhie rën guiëb guial yabanman loj ree bengüt. ¹¹ Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaloj Elías gui't?

¹² Badxi'man laan rëbaman:

—Walican yaloj Elías gui't, laaman guzuxnejz gra. Per, ¿chexc zeel ca loj xtiidx Dios guial Bén

guxhaal Dios sagdiaj da'taman ad zën tēet reeman laaman? ¹³ Naj rni lojdi guial mal bi't Elías, abi' beennē reeman laaman ni guyëntzi reeman zi'c ca loj xtiidx Dios ni rayal sacaman.

Rayüjn Jesús tijb xin yu' xindxab luxdoo

(Mt. 17:14-21; Lc. 9:37-43)

¹⁴ Chi badxin Jesús lod za' sta'n ree xbejnman, baguiaaman dád zien bejn riga', nē ree mextr rajc ley za' yagaj cadildiidx reeman con ree xbejnman.

¹⁵ Chi baguiaa reeman zēed Jesús, dád badxa loj reeman abi' baxüün reeman bicajpdioz reeman laaman. ¹⁶ Dxel gunabdiidxaman loj reeman rëbaman:

—¿Chexc zeel cadildiidxidi?

¹⁷ Abi' rëb tijb bën za' yagaj:

—Mextr, zidnē' da xi'nan lojl guial yu' xindxab luxdoox abi' nusa'nx laax gop. ¹⁸ Bantëez guin za'x, chi ru xindxab guin luxdoox rureeyujx laax, abi' rbëëx bichijn ro'x, raw tēe ree layix, dxel ratiaguix. Ma gunaaban loj ree xbejnl din nabëe reeman xindxab guin, per ad gojct reeman.

¹⁹ Zeel rëb Jesús:

—¿Bën ad rliladxt! ¿Xt goc gazunē'n lëjt gadaan tēen lëjt? Gol tanē xinzii guie.

²⁰ Dxel binē reeman laax lojman. Per chi baguiaa xindxab guin laaman, laa bagüjtya'gajquix xin guin, bareeyujx laax abi' rbixtjüpix ririi tēe bichijn ro'x. ²¹ Dxel gunabdiidx Jesús loj xdadix rëbaman:

—¿Goc guzuloj rajquix zian?

Badxi'man laan rëbaman:

—Diizd xindobëzix. ²² Dád zien volt ruzaalix laax loj guiij nē loj nijs din guiëtix. Zeel bal zajc

güünl xhienin por dunujn, gognë dunujn, baya dunujn.

²³ Dxel rëb Jesús lojman:

—¿Chexc zeel nal, “bal zajcan”? Graczan zajc bal chu rililadx naj.

²⁴ Dxel gurixdiaj xdadix rëbaman:

—¡Rililadxan lüj, gognë naj din chililadxan mazri!

²⁵ Chi baguiaa Jesús cado'p zien bejn dxel gudilëman xindxab yu' luxdoo xin guin, rëbaman:

—Xindxab gop nacwa't tëë, rniabeen lüj din yariil luxdoo xin guin. Ad bal yayejcril luxdoox zatijb.

²⁶ Dxel gurixdiaj xindxab guin, abi' bagüjtya'x laax zatijb abi' bariix luxdoox, basa'nx laax zi'c xingüt zeel rëb ree bejn guial ma güjtix. ²⁷ Per gunaaz Jesús yaax gulesaman laax, dxel guzulix.

²⁸ Dxel bayu Jesús lënü con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalëen xindxab guin luxdoo xin guin?

²⁹ Badxi' Jesús san rëbaman:

—Par yarii lasa' ree xindxab guin, rayal cwedx guiniabidi Dios guiba'n tëedi.

*Rugojn Jesús zatijb guial guiëtaman
(Mt. 17:22-23; Lc. 9:43-45)*

³⁰ Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj, ³¹ guial culüü ree xbejnman, rëbaman:

—Yayü reeman Bén guxhaal Dios loj ree bén gugüjt laaman, per ni gac choon dxej yabanman.

³² Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

¿Chu mazri zojbloj?

(Mt. 18:1-5; Lc. 9:46-48)

³³ Dxel badxin Jesús Capernaum con ree xbejnman, abi' badxin reeman yu lod zojb reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

³⁴ Per achet rëb reeman guial cadildiidx reeman lunejz chu reeman mazri zojbloj. ³⁵ Dxel gurej Jesús, gurejdxaman guidxiptio'p reeman, rëbaman:

—Bal chu Bén rën gac mazri Bén zojbloj lojdi, rayal güün laagajcaman zi'c tijb Bén ad zojblojt güün tēeman sirv loj gradi.

³⁶ Dxel cwa'man tijb xindoo, bazujman laax galay reeman, zianz gudiidxaman laax, rëbaman:

³⁷ —Bén ridxga' tijb xindoo por naj, najn ridxga'man, guiáad Bén ridxga' naj, Bén guxhaal najn ridxga'man.

Bén ad za't contr dunuj ree za'man con dunuj ree
(Lc. 9:49-50; Mt. 10 :42)

³⁸ Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

³⁹ Badxi' Jesúsán rëbaman:

—Ad rudxoondi, din Bén rüjn milagr por da guialrniabeen, ad zile't guinieeguijdxaman naj.

⁴⁰ Bén ad za't contr dunuj ree, za'man con dunuj ree. ⁴¹ Chutëez Bén gunee majsi tibxijgzi nijs lojdi

guial najdi xbejn Cristo, diidxli rnin guial ziangajc yu' ni gudëed Dios lojman.

*Bén ruzaalguiiw bejn din güünman dol
(Mt. 18:6-9; Lc. 17:1-2)*

⁴² Chutëez bén guzaalguiiw tijb bén qui rliladxri naj din güünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo. ⁴³ Bal laagajc yaal rusajb lüj loj dol, zagdxeli gutü'n. Mazri zagdxe chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü', ⁴⁴ lod ad rëjtt ree bizog lod ad rayü' tëet bajl. ⁴⁵ Abi' bal laagajc guia'l rusajb lüj loj dol, zagdxeli gutü'n. Mazri zagdxe chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü', ⁴⁶ lod ad rëjtt ree bizog lod ad rayü' tëet bajl. ⁴⁷ Bal laagajc guiaalojl rusajb lüj loj dol, zagdxeli gulëen. Mazri zagdxe chu' con tiblodzi guiaalojl xanyabaa guial che con groplad guiaalojl gabijl lod yu' bajl ni ad yu't dxej yayü', ⁴⁸ lod ad rëjtt ree bizog lod ad rayü' tëet bajl.

⁴⁹ 'Zi'c ru zëd guijc guialraw, ziangajc ree bén rliladx naj sagdiaj reeman din gac reeman naya.

⁵⁰ 'Ni zagdxe naj zëd, per bal id zajcran naxij, ¿xhieza naag yayajcan naxij zatijb? Gol been zi'c rayal chitëe saquidi zi'c zëd ni ad rüjnt sirv, gol gubajnnë tëe lasa'di zagdxe.

10

*Rulüü Jesús xcwent guial rala' lasa'
(Mt. 19:1-12; Lc. 16:18)*

¹ Chi baza Jesús Capernaum, dxel wejman niz Judea në stiblad ro' guiiw Jordán. Abi' lod za'man bido'p ree bejn zatijb, dxel guzuloj culüüman laa reeman zi'c goc xcostumbraman. ² Yu' ree bénfarisew gubig lod za'man. Abi' par güün reeman laaman prueb, gunabdiidx reeman lojman rëb reeman:

—¿Zajc yala' xinguaaw lacheelix ya?

³ Badxi'man laan rëbaman:

—¿Xhie gunabee Moisejs güüнди?

⁴ Abi' rëb reeman:

—Cwëjb Moisejs yala' xinguaaw lacheelix, per gudëëdix gui'ch tia'man guial ma bala' reex.

⁵ Dxel rëb Jesús:

—Rëb Moisejs gac zian guial nadidi. ⁶ Per guia'xchej chi gule'cchaaw Dios guidxliuj, “beenman xinguaaw con béngunaa”. ⁷ “Zeel xinguaaw gusa'n xdad xniaax din guibannë lacheelix, ⁸ dxel grop reex ma gac zi'c tijbzi bejn.” Zianan zeel ad najtri reex tio'p, ma naj reex tijbzi. ⁹ Zeel, bénguidxliuj ad rayalt yala'man lasa' ni ma bachajg Dios.

¹⁰ Chi bayu reeman lënü, gunabdiidx ree xbejnman lojman zatijb, xcwent ni guneeman. ¹¹ Abi' rëbaman loj reeman:

—Xin rala' lacheel, abi' rtia'x ben ren dolan cayüjnx, ¹² ziangajc bal tijb béngunaa yala' lacheelaman abi' tia' xin ren laaman, dolan cayüjnman.

Rüjnle' Jesús xindoo ree

(Mt. 19:13-15; Lc. 18:15-17)

¹³ Binë ree bejn xindoo ree lod za' Jesús din gudxiib yaaman guijc reex. Per ree xbejnman

guzuloj cadilë reeman bén binë ree laa reex. ¹⁴ Chi baguiaa Jesús zian, balenman zeel rëbaman:

—Gol badëöd mod gui't reex lon, ad bal rudxoondi. Din lod rniabee Dios naj par ree bén naj zi'c laa reex. ¹⁵ Diidxiczi rnin, bén ad rliladxt xguialrniabee Dios zi'c tijb xindoo, ad zile't chu'man lod rniabee Dios.

¹⁶ Dxel gudiidx Jesús laa reex, badxiib yaaman guijc reex, beenle'man laa reex.

Xcwent tijb xinrijcw

(Mt. 19:16-30; Lc. 18:18-30)

¹⁷ Chi ma gusnuu xnejz Jesús, ruxüün tijb xinguaaw bidxinx abi' bazuxibix lojman, dxel gunabdiidxix rëbix:

—Mextr za'c, ¿xhie rayal günan din ga'pan guialnaban tiblayaa con Dios?

¹⁸ Badxi' Jesús laan rëbaman:

—¿Chexc zeel nal lon benza'c? Achut naj benza'c, tijbzi Dios. ¹⁹ Lüy rajc ree mandamient, “Ad gugüjtil bejn, ad sunël béngunaa ren, ad cwani, ad cwëel xtiidx bejn ad gusquiee tëel, gojp respejt xdad xniaal.”

²⁰ Dxel rëbix loj Jesús:

—Mextr, gra ree ni guin cayünan diizd xindoon.

²¹ Baguiaa Jesús lojx, bayaman laax, rëbaman:

—Per yu' zatijb ni riaadx güünl: bigto' gra ni rajpil, badëöd milia guin loj ree bénprob, zian gapil guialnaza'c xanyabaa dxel guidnalil naj majsi xhietëez saquil.

²² Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

²³ Dxel baguiaa Jesús loj gra reeman, abi' rëbaman loj ree xbejnman:

—¡Dád nawëëg naj chu' benrijcw loj xguialrniabee Dios!

²⁴ Dád badxa loj ree xbejnman ni rëbaman. Per rëbaman loj reeman zatijb:

—Xi'n, ¡bén yu'guijc mazri ni rajpaman, dád nawëëg naj chu'man loj xguialrniabee Dios!

²⁵ Adli nawëëgt téd tijb camell xan gagux guial chu' tijb benrijcw loj xguialrniabee Dios.

²⁶ Chi biguien reeman diidx guin ree, mazri badxa loj reeman, dxel rniabddiidx loj lasa' reeman, rëb reeman:

—¿Chu zajc laa loj xcasti Dios?

²⁷ Baguiaa Jesús loj reeman, abi' rëbaman:

—Par bejn nawëëgan, per par Dios ad nawëëgtan din par Dios graczan zile' gac.

²⁸ Dxel guzuloj rëb Bëd loj Jesús:

—Dunujn basa'nan graczi ni raya'pan persi zudnaalan lüj.

²⁹ Badxi' Jesúsán rëbaman:

—Diidxliczi ganin lëjt, chutëëz bën rusa'n lidx, o bijch, o bizan, o xdad xniaa, o lacheel o xi'n, o guidxliuj ree por naj në por xtiidxza'c Dios, ³⁰ loj guidxliuj guie tia'man tibgayuu volt mazri guial loj ni basa'nman, bal najn lidxaman, bijchaman, bizanman, xniaaman, xi'nman, në xguidxliujman, majsi guidib wazagdiaj, abi' guidxin dxej gapaman guialnaban tiblayaa con Dios. ³¹ Per dád zien ree bën naj bën yaloj yan, gac reeman bën bigra, guiáad ree bën naj bën bigra yan, gac reeman bën yaloj.

*Rugojn Jesús zatijb guial guiëtaman
(Mt. 20:17-19; Lc. 18:31-34)*

³² Chi zë reeman Jerusalén, ned Jesús loj ree xbejnman, abi' dád radxaloj reeman guial zëman Jerusalén, guiáad ree bën nal laaman rdxeb reeman. Dxel gurejdx guidxiptio'p ree xbejnman lood ren, zianz guzuloj rëbaman ni sacaman:

³³ —Rëbaman loj reeman: Lëjt ragbee guial ziyo' ree Jerusalén, abi' naj najn Bén guxhaal Dios, yayü reeman naj loj ree bixhioz rniabee ree bixhioz, në loj ree mextr rajc ley. Abi' nabee reeman guiëtan, yayü tëë reeman naj loj ree bën ad najt bën Israel.

³⁴ Guze' reeman naj, gucojp xhiejn reeman lon, quin reeman gugüjt tëë reeman naj, per yayon dxej yabanan.

Ni gunab ree Jacob con Waj

(Mt. 20:20-28)

³⁵ Dxel Jacob con Waj xi'n Zebedeo, gubig reeman loj Jesús rëb reeman:

—Mextr, rayënan güünl tijb favor ni yanaaban lojl.

³⁶ Abi' gunabdiidxaman rëbaman:

—¿Xhie rëndi günan?

³⁷ Badxi' reeman laan rëb reeman:

—Rayënan guial chi ma canabeel, yadxu'n cwë'l, tijb dunujn yadxu' xladbeel, zatijb dunujn yadxu' xladruvejsil.

³⁸ Badxi'man laan rëbaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c gazaagdiajn ya? ¿Zajc guiëtidi zi'c guiëtan ya?

³⁹ Badxi' reeman laan rëb reeman:

—Zayajcan.

Dxel rëb Jesús:

—Waliquidi sagdiajdi zi'c naj guiët tēēdi zi'c naj,
⁴⁰ per guial cwedi da ladbeen o da ladruvejsan, ad najt rayal gune laan, din ma najn par ree bēn rayal laan.

⁴¹ Chi biguien zachii xbejn Jesús ni rēb reeman, dád balen reeman Jacob con Waj, ⁴² per gurejdx Jesús laa reeman rēbaman:

—Lējt ragbee guial ree bēn rniabee loj guidxliuj guie, rniabee reeman bejn ree zi'ctzi rēn reeman, guiáad ree bēn zojbloj rüjnnē reeman bejn ree zi'ctzi rēn reeman por guialrniabee ni rajp reeman. ⁴³ Per con lējt ad rayalt gac zian. Din bal chu rēn gac bēn rniabee lojdi, rayal güünman sirv lojdi, ⁴⁴ guiáad bēn rēn gac bēn zojbloj, rayal güünman sirv loj gradi zi'c bēn nado'. ⁴⁵ Din ni'qui naj najn Bēn guxhaal Dios, ad zialtan loj guidxliuj par güün ree bejn sirv lon, zialan din günan laa reeman sirv, abi' con da guialnabanan gaguixan por xtol zien ree bēnguidxliuj.

*Rayajc guiaaloj tijb xin ad ranit loj la Bartimeo
 (Mt. 20:29-34; Lc. 18:35-43)*

⁴⁶ Bidxin reeman guiedx Jericó, abi' chi ma cayrii Jesús luguiedx guin, con ree xbejnman nē ree benzien. Tijb xin ad ranit loj lax Bartimeo, xi'n bēn la Timeo, zojbix cwē' nejj rniabix carda. ⁴⁷ Chi biguiejnx cadēd Jesús bēn Nazaret niz yagaj, guzuloj cabidxa'x rēbix:

—¡Jesús, xdiaa Davi, baya naj!

⁴⁸ Dád zien ree bejn ridilē laax din yacwēēz ro'x. Per mazri rejs rbidxa'x rēbix:

—¡Xdiaa Davi, baya naj!

⁴⁹ Dxel guzudxe Jesús rēbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, lüj caneeman.

⁵⁰ Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús.

⁵¹ Gunabdiidx Jesús lojx rëbaman:

—¿Xhie rënl gūnan por lüj?

Badxi'xan rëbix:

—Mextr, rënan yani lon.

⁵² Dxel rëb Jesús:

—Ma zajc yaguiajl, ma bayajquil guial bililadxil naj.

Loj hor zii gajc bani lojx dxel zinalix Jesús niz yagaj.

11

Ru Jesús Jerusalén

(Mt. 21:1-11; Lc. 19:28-40; Jn.12 :12-19)

¹ Chi ma zë reeman gajxh Jerusalén, niz lod riga' guiedx Betfagé con Betania, gajxh guia' la Olivos, dxel guxhaal Jesús tio'p ree xbejnman, ² rëbaman:

—Gol chej guiedxdo riga' delant guin. Chi guidxindi guidxaaglojdi tijb burquie'n, caduub achut wabib laab. Gol guxhiequib gol tanëb.

³ Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

⁴ Dxel wej reeman, bidxaagloj gajc reeman burdo guin, caduub runejz ro' tijb port, abi' guxhie reeman laab.

⁵ Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

⁶ Badxi' reeman laan zi'c rëb Jesús, abi' cwëjb ree bën guin zinë reeman laab. ⁷ Bidxinnë reeman laab lojman, badxiib xab reeman xijchib, persi gudxibaman laab. ⁸ Zien ree bejn riguijxh xab niz lod rdëdaman, yu' tää reeman rutüüg zijn persi riguijxh reeman laan niz lod rdëdaman.

⁹ Abi' zi'c ree bën ned, në ree bën nal rbixdiaj reeman, rëb reeman:

—¡Gagnëman dunuj ree yan! ¡Nagle' bën zëed por Dios! ¹⁰ ¡Nagle' bën zëed nabee zi'c dux béngulal ree rey Davi! ¡Quixtëe dux Dad ree Dios Bén yu' xanyabaa!

¹¹ Zian guyu Jesús Jerusalén abi' guyuman lën yadooro' Jerusalén. Chi gulox baguiaaman graczi, dxel zinë guidxiptio'p ree xbejnman Betania guial ma gudxe.

*Bazaal Jesús diidx guijc yag higo
(Mt. 21:18-19)*

¹² Chi bareguiaal, barii reeman Betania. Dxel guzuloj calaan Jesús. ¹³ Zijtri baguiaaman tijb yag higo ca ree balag lojn. Abi' wejman biquiaaman bal ca higo lojn. Per achet bidxaaglojman, balagzi ree ca lojn din ad xtiamptanan. ¹⁴ Dxel rëbaman loj yag higo guin:

—¡Ad yu'tri dxej gaw bejn ninejxh tia lojl!
Abi' biguiejn ree xbejnman ni rëbaman.

*Rabëe Jesús bën ruto' ree ro' yadooro' Jerusalén
(Mt. 21:12-17; Lc. 19:45-48; Jn. 2:13-22)*

¹⁵ Chi bidxin reeman Jerusalén. Dxel guyu Jesús ro' yadooro' Jerusalén guin, abi' guzuloj caybëeman bën cuto' ree në ree bën cazii. Barexguiataman xmex ree bën ruchaa milia con xyagxhil ree bën ruto' ree palom, ¹⁶ ad rtiëjbtaman xhie chu'në ree bejn ro' yadoo guin. ¹⁷ Abi' guzuloj culüüman laa reeman, rëbaman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁸ Bixhioz rniabee ree bixhioz con ree mextr rajc ley, chi biguiejn reeman ni rëb Jesús, guzuloj raguiil reeman mod xhienaag gugüjt reeman Jesús, guial rdxeb reeman laaman din gra bejn radxaloj ni rulüüman. ¹⁹ Chi ma caxhin, bazané ree xbejn Jesús Jerusalén.

Tijb yag higo ni gubidx
(Mt. 21:20-22)

²⁰ Chi bareguiaal rsildoo, badëd reeman niz lod zobj yag higo guin, abi' baguiaa reeman ma gubidx diizd liujn. ²¹ Dxel basaaladx Bëd ni rëb Jesús, abi' rëbaman lojman:

—Mextr, jbaguiaa yag higo ni bazaalil diidx guiic ma gubidxan!

²² Badxi' Jesúsán rëbaman:

—Gol bililadx Dios. ²³ Din diidxliczi ganin, bal chu guiëb loj guia' guin: “Bisüd guie biajb loj nijsdoo”, bal id yu' nawëëg luxdooman, bal rililadxaman, gac ni guneeman. Zian gacan. ²⁴ Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'dan. ²⁵ Guiáad chi ribejdx rniabidi Dios, bal yu' bën rdxe'chidi,

gol beenman perdon din ziangajc xDadidi b́en yu' xanyabaa güünman perdon xtolidi. ²⁶ Din bal id züjndi perdon, ziangajc xDadidi B́en yu' xanyabaa ad züjntaman perdon xtolidi.

Xgualrniabee Jesús

(Mt. 21:23-27; Lc. 20:1-8)

²⁷ Chi badxin reeman Jerusalén. Chi caza Jesús niz lén yadooro' Jerusalén guin, dxel gubig bixhioz rniabee ree bixhioz con ree mextr rajc ley con ree xguxtis ree b́en Israel, ²⁸ gunabdiidx reeman loj Jesús, rēb reeman:

—¿Xhie gualrniabee rajpil zeel rüjnl ni guin ree? ¿Chu banee gualrniabee lojl güünl zian?

²⁹ Badxi' Jesúsán rēbaman:

—Ziangajc naj yu' ni ganabdiidxan lojdi, bal yadxi'dan dxel ganin chu banee gualrniabee günan ni guin ree. ³⁰ ¿Chu guxhaal Waj bidgaroob-nijsaman bejn ree? ¿Dios ya o bénguidxliuj? Gol badxi'n.

³¹ Dxel guzuloj rēb loj lasa' reeman:

—Bal yaguie'ch ree, Dios guxhaal laaman, zanamán: “¿Chexquiza zeel ad bililadxtidi laaman?”

³² Ad zajc tēet yaguie'ch ree, bénguidxliuj guxhaal laaman.

Rēb reeman zian gual rdxeb reeman bejn ree, din graczi reeman rliladx gual gojc Waj tijb b́en badēē xtiidx Dios loj ree bejn, b́en wali gunee xtiidx Dios. ³³ Abi' badxi' reeman laan rēb reeman:

—Ad rayagbeetan.

Zeel rēb Jesús loj reeman:

—Ni'qui naj ad zanitan lojdi chu banee gualrniabee günan ni guin ree.

12

*Xcwent ree mojs guiidx
(Mt. 21:33-46; Lc. 20:9-19)*

¹ Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin.

'Zianz badëëman laan garol loj ree bën güün laan dxiin, briitaman zëman zijt. ² Chi bidxin dxej yala' reeman uv guin, guxhaal tijb xmojsaman din chigxiiman ni rayalaman. ³ Per ree bën rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi. ⁴ Dxel guxhaal bën naj xguidxliuj laan za-tijb xmojsaman, per ziangajc, bacaaguiaj reeman laaman, gula' reeman guiycaman abi' guneeguiidx reeman laaman. ⁵ Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

⁶ 'Dxel bën naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax gial gunaladxaman: “Zajp reeman da xi'nan respejt.”

⁷ Per ree bën guin, rëb loj lasa' reeman: “Xin guin naj xin yaya'nnë guidxliuj guin, yagüjt reex din gacan du xieen ree.” ⁸ Dxel gunaaz reeman laax, bagüjt reeman laax abi' babëë reeman laax loj guidxliuj guin.

⁹ Dxel gunabdiidx Jesús loj ree bén caneenëman, rëbaman:

—Yan, ¿xhie naladxidi güün bén naj xguidxliuj laan? Zi'taman din gugüjtaman bén guin ree, dxel gudëëman guidxliuj guin loj ree ben ren.

¹⁰ ¿Nid wayoolidi loj xtiidx Dios ya?, lod rëb: Guiaj ni gulëëgo'n ree bén rüjn yu, laan goc ni mazri been sirv gojcnë yu guin.

¹¹ Zian been dux Dad ree Dios, zeel radxaduloj ree.

¹² Chi biguiejn ree bén rniabee guin ni guneë Jesús, guyën reeman niniaaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

Xcwent Impuest

(Mt. 22:15-22; Lc. 20:20-26)

¹³ Guxhaal reeman tio'p choon ree bénfarisew në tio'p choon ree xbejn Herodes lod za' Jesús, din yaguuil reeman mod guinieë Jesús diidx ni gudxiib reeman guijc din gac cwe'c reeman xguialquiaman. ¹⁴ Abi' rëb reeman:

—Mextr, dunujn rayagbee guial lüj rniece diidxli ad ridxga' tëetil chu naj bejn. Din par lüj tiblojzi naj bejn, abi' walil rulüül guial xhienaag rën Dios guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxetan? ¿Zadijxanan ya o ad zadijxtanan?

¹⁵ Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

¹⁶ Dxel badëëd reeman cintabl guin lojman, abi' rëbaman:

—¿Chu loj ca lojn, chu tää laj ca lojn?

Badxi' reeman laan rëb reeman:

—Loj César ca lojn në lajman.

¹⁷ Dxel rëb Jesús loj reeman:

—Gol badëecliza loj César ni naj xieen César, guiaad loj Dios gol badëed ni naj xieen Dios.

Dád badxa loj reeman ni rëbaman.

*Xcwent guial yaban ree bengüt
(Mt. 22:23-33; Lc. 20:27-40)*

¹⁸ Tio'p choon ree bénsaducew bignaj Jesús, laa reeman ad riladxt guial yaban ree bengüt. Zeel gunabdiidx reeman loj Jesús rëb reeman:

¹⁹ —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xin güt guin guxhliaanë béngunaa bizëjb guin din chu' xi'n reex zi'c gulüü xi'n xingüt guinan.

²⁰ Guyu tijb famil lod goc reex gajdx bijch. Baxh-liaa xin yaløj guin, per güjtix abi' ad guyut xi'n reex con lacheelix. ²¹ Dxel bijch barojpax baxhliaanë béngunaa guin, per güjt gajquix, ad guyu gajct xi'n reex. Abi' ziangajc guzajc xin bayon guin, ²² abi' zianz baxhliaanëman guigajdx reex, zianz bara reex güjt achut xi'n reex guyu con laaman. Ni bigra tää në béngunaa guin güjt. ²³ Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhliaanë laaman?

²⁴ Badxi' Jesúsán rëbaman:

—Ad laat naj xgab rüjndi guial ad nünbeetidi xtiidx Dios ad ragbee tēetidi xhienaag naj xguialrniabeeman. ²⁵ Din chi yaban ree bengüt, ad zuxhliatri reeman, ad zudēē tēetri xi'n reeman guxhliaa, ma gac reeman zi'c ree anjl yu' xanyabaa. ²⁶ Abi' xcwent ni yaban ree bengüt, ¿nid wayoolidi loj xlibr Moisejs ya, lod rēb guial baguiaaman yag ni cayē'c? Yagaj biguien cha' Dios, rēbaman lojman: “Naj naj xDios Abraham, xDios Isaac nē xDios Jacob.” ²⁷ Din Dios ad najtaman xDios ree bengüt, najman xDios ree bēn naban. Zeel ad laat naj xgab rüjndi.

Mandamient mazri zojbloj

(Mt. 22:34-40)

²⁸ Chi biguiejn tijb mextr rajc ley badxi' Jesús xtiidx reeman zagdxe guial bacaagdiajgaman diidx ni cayü reeman, gubigaman lojman, abi' gunabdiidxaman rēbaman:

—¿Con mandamientan mazri zojbloj loj gra ree mandamient?

²⁹ Badxi'man laan rēbaman:

—Mandamient mazri zojbloj rēban: “Gol bacaagdiajg, bēn Israel, dux Dad ree Dios, tijbzi laaman naj Dios. ³⁰ Guyēn xDadil Dios guidiblagaa guidib guiyc guidib ladxil.” Laan naj mandamient mazri zojbloj. ³¹ Mandamient rarojp, rēban: “Guyēn ree ben ren zi'c rēn lüj gajc.” Achet mandamient mazri zojbloj guial loj grop ree mandamient guie.

³² Dxel rēb mextr guin loj Jesús:

—Zagdxequi guneel, Mextr. Waliquil tijbzi Dios yu', achutri ben ren yu'. ³³ Abi' guidib guiyc guidib ladx bejn guiēnman laaman guidiblagaa, guiēn

tëëman ben ren ree zi'c rën laagajcaman. Laan naj ni mazri zobjloj guial loj gra gon ni rudëed bejn loj Dios.

³⁴ Chi biguien Jesús badxi' mextr guinan zagdxe, rëbaman:

—Ad zijtt za'l par chu'l loj xguialrniabee Dios.

Dxel achutri bayax xhie niniabdiidx lojman.

Chu loj xdiaa za Cristo

(Mt. 22:41-46; Lc. 20:41-44)

³⁵ Chi culüü Jesús bejn ree lën yadooro' Jerusalén, gunabdiidxaman loj reeman rëbaman:

—¿Chexc zeel rëb ree mextr rajc ley guial za Cristo loj xdiaa rey Davi? ³⁶ Awa Davi guin gajc gunee por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdxe'ch ree lüj guial'.”

³⁷ Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bën riga' lën yadoo guin dád nix yu' luxdoo reeman rucaagdiajg reeman xtiidxaman.

Ni rüjn ree mextr rajc ley

(Mt. 23:1-36; Lc. 11:37-54; 20: 45-47)

³⁸ Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdxe, ruladx tëë reeman gugajpdioz ree bejn laa reeman con respejt niz lunejz. ³⁹ Abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman.

⁴⁰ Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád

xchej rbejdx rniab reeman Dios. Per laa reeman mazri casti narooob yayal reeman.

Gon badëed tijb béngunaa bizëjb

(Lc. 21:1-4)

⁴¹ Tijb dxej zojb Jesús lën yadooro' Jerusalén niz lod za' alcancia ni ru gon, abi' ruguiaaman rgu' ree bejn milia lën alcancia guin, në zien ree ben-rijcw rgu' zro' milia. ⁴² Dxel bidxin tijb béngunaa bizëjb prob, badxe'man tio'p zintabldoo ni lasajc ta'nzi. ⁴³ Abi' gurejdx Jesús Bén naj ree xbejnman, rëbaman:

—Diidxli rnin lojdi guial Bén bizëjb prob guin mazri lasajc gon badxe'man guial loj gon badxe' gra ree Bén guin. ⁴⁴ Din graczi reeman rudxe' ni rüjn laa reeman sobr, per laaman majsi najman Bénprob, badxe'man graczi ni rajpaman par guibannëman.

13

Rëb Jesús guial yaze'n yadooro' Jerusalén

(Mt. 24:1-2; Lc. 21:5-6)

¹ Chi barii Jesús lën yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tëë naj ree yu guin!

² Badxi' Jesús san rëbaman:

—Zi'c ruguiaal yu narooob guin ree, zadxin dxej, ni'czi tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit

(Mt. 24:3-28; Lc. 21:7-24; 17:22-24)

³ Chi zojb Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Béd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:

⁴ —Guna, ¿goc gac zian? ¿Xhie sen gac chi ma zidyob gac zian?

⁵ Badxi' Jesús laan rëbaman:

—Gol gojp cudad chitëe chu gusquiee lëjt. ⁶ Din zien ree bën gui't guiëb reeman guial por naj zëed reeman, guiëb tëe reeman: “Naj naj Cristo”, abi' gusquiee reeman zien bejn.

⁷ Per lëjt chi guiguiejndi cayajc wadijl o zëeb didx gac wadijl, ad guidxebidi; din najczi gac zian, per ad por laatan ma bidxin dxej nit guidxliuj.

⁸ Din til nacion con stijb nacion, til tëe bën rajp guialrniabee con stijb bën rajp guialrniabee, gui't tëe ree xudoxh në gubijn niz ni niz guie. Zian gac chi ma suloj ree guialzi ni naj gac.

⁹ Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lën ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile' güdi da diidxan loj reeman. ¹⁰ Per yalojxgaj rüjn naguiejn guire'ch xtiidxza'c Dios loj gra ree nacion, dxelri nit guidxliuj. ¹¹ Chi chinë reeman lëjt loj ree guxtis, ad bal chu'di xgab, ad bal güün tëedi xgab xhie guiëbidi loj reeman. Gol gunee diidx gunee Dios lëjt loj hor guin. Din ad lëjtta guinee, xSprijt Diosan guinee. ¹² Abi' guidxin dxej yayü bejn laagajc bijchaman din guiëtix, ziangajc ree bën naj dad yayü laagajc xi'n reeman, abi' ree bejn

gayü xdad xniaa reeman par guiët reeman. ¹³ Gra bénguidxliuj guidxe'ch lëjt guial najdi da bejnan, per Bén sudxi'ch loj ni riladxaman naj xt dxej chigra guibanman, laaman yayal xanyabaa.

¹⁴ 'Chi guguaadi zojb tijb ni dxuudx lën yadooro' Jerusalén, zi'c bacaa Daniel, Bén badëë xtiidx Dios loj ree bejn diizd gulal (Bén gool ree gui'ch guie, gol bignia'n), guial Bén zojb ree niz Judea chigxüün reeman niz dajn. ¹⁵ Guiáad Bén yë'p guiic yu lidx dxejzii, ad yayu lëñü lidxaman tia' xhie xieenman. ¹⁶ Guiáad Bén za' dajn, ad yayejc lidxaman chigxii xabaman. ¹⁷ ¡Probza ree béngunaa nüü xi'n o Bén ca' ree xindobëz lën ree dxej zii! ¹⁸ Gol gurejdx gunab Dios chitëë yayal gac zian tiamp nayaag, ¹⁹ din dád guialziro' chu' dxejzii ree, zi'c ad wayajtczi diizd chi beenchaaw Dios guidxliuj, ad yu' tëetri dxej gac zian. ²⁰ Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree Bén rënman, Bén gulejman par laaman.

²¹ 'Bal chu na lojdi: “Gol baguiaa, laa Cristo za' guie”, o “laaman za' ni”, ad bal chililadxidi. ²² Din gui't zien ree bejn, na reeman guial laa reeman naj Cristo o na reeman laa reeman naj Bén rudëë xtiidx Dios loj ree bejn, abi' güün reeman milagr ree në ree graloj ni yadxaloj ree bejn, din gusquiee reeman laa reeman, abi' bal zile'n xt zajc në ree Bén gulej Dios gusquiee reeman. ²³ Zeel gol gojpcudad, ma bagojnxgajn lëjt gra ni gac.

*Gui't Bén guxhaal Dios zatijb
(Mt. 24:29-35, 42-44; Lc. 21:25-36)*

24 'Per lèn ree dxej ni ma gudöd gra ree guialzi guin, zacajy loj gubijdx abi' ad zusnitri bëëw, 25 zayajb ree bajl yu' xanyabaa guiáad gra ree ni yu' xanyabaa guiniib reen. 26 Dxel guguaiaa ree bejn Bén guxhaal Dios rdiinman bacha' zëédaman loj zaj con xguialrniabee narooberman. 27 Abi' guixhiaal ree xianjlaman guidiblagaa guidxliuj din guchajg reeman lasa' ree bén ma naj par Dios.

28 'Gol badxe'guijc ni ganin lëjt: Chi ma naquie'n xidx yag higo abi' ma caydxib ree xbalagan, lëjt ragbee guial ma zidyob tiamp nalaa. 29 Ziangajc chi guguaiaadi ma cayajc ree ni guin, gol gogbee guial ma zidyob dxej gac zi'c ma rnin. 30 Diidxli rnin lëjt guial gra ree ni guin gac chi gad ree bén naban lèn ree dxej guie guiët. 31 Guidxliuj në xanyabaa zanijt reen, per da diidxan ad zadëdt gacan cumplid.

32 'Per achut ragbee xhie dxejn xhie tëë horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

33 'Zeel gol gojp cudad, gol guzujsin tëë, gol gurejdx gunab Dios din ad ragbeetidi goc gac zian. 34 Ni guin ree naj zi'c chi ririi tijb bejn rejman zijt. Abi' chi gadaman grii rudëëman dxiin loj tijbgaj ree xmojsaman, rniabee tëëman susin bén rajp ro' port. 35 Yan ziangajc lëjt gol guzujsin, din ad ragbeetidi goc o xhie horan guialan bal chi ma ribej guiaal ya, o garol guiaal, o chi ma rbidxa' guid, o rsildoo. 36 Zeel gol guzusin din bal dxejczy guialan ad guidxaaglojn lëjt ad cayüjntidi zi'c rayal. 37 Abi' ni canin lojdi, loj gradi caninan: Gol guzujsin.

14

*Baya'n reeman diidx xhienaag guiniaaz Jesús
(Mt. 26:1-5; Lc. 22:1-2; Jn.11 :45-53)*

¹ Zatio'p dxej riaadx gal lanij pascw, lanij raw ree bejn guiadxtil ni ad yu't lewadur. Abi' ree bixhioz rniabee ree bixhioz con ree mex't rajc ley, raguiil reeman mod xhienaag gusquiee reeman Jesús, din guiniaaz reeman laaman gugüjt reeman laaman. ² Per rëb reeman:

—Ad zaguieent ree zian loj ree dxej lanij guin, chitëë gac naquie'.

*Baroob tijb béngunaa perfum guijc Jesús
(Mt. 26:6-13; Jn.12 :1-8)*

³ Dxel chi za' Jesús luguiedx Betania lidx Simón, bën gunee reeman leproso, abi' chi zojbaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojcchawnën ganax nardo, zianz guxhalaman ro' lumejt guin persi baroobaman perfum guin guijc Jesús.

⁴ Abi' yu' ree bën za' yagaj bidxe'ch, rëb loj lasa' reeman:

—¿Chexc zeel guxhie'man perfum guin? ⁵ Awa zajc nido'n choon gayuu denario din nüjnan yudar bënprob ree.

Abi' caneeguijdx reeman béngunaa guin.

⁶ Per rëb Jesús loj reeman:

—Gol basa'nman. ¿Chexc zeel ruslendi laaman? Zagdxé naj ni beenman con naj. ⁷ Zianczi sunëdi bënprob ree, abi' zajc güüнди laa reeman yudar chi guiëнди, sa'n naj ad ziantczi sunëди naj.

⁸ Béngunaa guie beenman ni golguzujman, ma beenchaawxgajman da cuerpan par chi guidxin

dxej guiguie'chan. ⁹ Diidxiczi rnin lëjt, guial guidib loj guidxliuj bantëez guin guiniee reeman xtiidxza'c Dios, zü ree bejn diidx ni been béngunaa guin con naj din gusaaladx reeman laaman.

Baguiil Judas mod xhienaag yayüman Jesús
(Mt. 26:14-16; Lc. 22:3-6)

¹⁰ Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman. ¹¹ Chi biguiejn ree bixhioz guin zian, dád babaa reeman. Abi' rëb reeman gudëed reeman milia lojman. Dxel guzuloj raguuilaman mod xhienaag yayüman Jesús.

Gudawnë ree xbejn Jesús xche
(Mt. 26:17-29; Lc. 22:7-23; Jn.13 :21-30; 1Co.11 :23-26)

¹² Dxej ni guzuloj lanij raw ree bén Israel guiadx-til ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rënl yuguieenan ni yadaaw ree guxhin pascw?

¹³ Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaaadi tijb xinguaaw ca' re yu' nijs. Gol chinalix. ¹⁴ Abi' lod yayux, gol güjdx loj bén naj lidxan: “Na mextr: ¿Ban lënü gawnë ree xbejnman yan guxhin pascw?” ¹⁵ Dxel gulüüman lëjt tijb lënü narooob ni rarojp cwaa, ma najcchaaw lënü guin. Yagaj gol been ni yadaaw ree xche.

¹⁶ Dxel brier ree xbejnman wej reeman luguiedx guin, abi' bidxaagloj gajc reeman zi'cgajczi

rëbaman, zianz been reeman ni gaw reeman guxhin pascw.

¹⁷ Chi gure guiaal, bidxin Jesús con guidxiptio'p ree xbejnman. ¹⁸ Dxel chi zojb reeman xan mex cayaw reeman, rëb Jesús loj reeman:

—Diidxiczi rnin lojdi guial tijb lëjt, bën cayawnë naj, laaman yayü naj.

¹⁹ Dád guyunaya reeman, abi' guzuloj canabdi-idx tijb gaj reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

²⁰ Badxi'man laan rëbaman:

—Loj guidxiptio'pidi, tijb lëjtan, bën cugajdx xguiadxtil loj gajc pliajt lod cugajdx da guiadxti-lan, laaman. ²¹ Walican guial Bén guxhaal Dios naj sacaman zi'c ca loj xtiidx Dios. Per, jprob bën yayü laaman! Zagdxeli naj par laaman ad niutaman loj guidxliuj

²² La'tgaj cayaw reeman, cwa' Jesús guiadxtil abi' badëëman quixtëë loj Dios, dxel gula'man laan badëëman loj reeman, rëbaman:

—Gol gudaw guiadxtil guie, laan naj da cuerpan.

²³ Dxel cwa'man tijb cojp yu' vin, chi gulox badëëman quixtëë loj Dios, badëëman cojp guin loj reeman, abi' gra reeman gu' vin yu' lojn. ²⁴ Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guixal tijb nejb cüb xhienaag gap ree bejn perdon loj Dios. ²⁵ Naj rni lëjt, ad yu'tri dxej guië'n vin rajcchaawnë uv, xt dxej ni guië'n vin cüb lod rniabee Dios.

*Rëb Jesús guial guiëb Bëd ad nünbeetaman laaman
(Mt. 26:30-35; Lc. 22:31-34; Jn.13 :36-38)*

²⁶ Chi gulox biil reeman tijb cant par Dios. Dxel zë reeman ruguia' Olivos. ²⁷ Dxel rëb Jesús loj reeman:

—Graczidi tio'nladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, abi' guire'ch reeb.” ²⁸ Per chi yabanan, yaløj naj ganeed lojdi gan Galilea.

²⁹ Dxel rëb Bëd lojman:

—Majsi gra reeman tio'nladx lüj, per naj ad zaro'nladxtan lüj.

³⁰ Badxi' Jesúsán rëbaman:

—Naj rni lüj Bëd, yan guxhin gajc chi gad guid cwidxa' tio'p volt, choon volt mal rëbil guial ad nünbeetil naj.

³¹ Per naguiejn rüjn Bëd rëbaman:

—Majsi guiëtnë'n lüj, per ad zëtan guial ad nünbeetan lüj.

Abi' graczi reeman rëb zian.

*Rbejdx rniab Jesús Dios lod la Getsemaní
(Mt. 26:36-46; Lc. 22:39-46)*

³² Chi bidxin reeman tijb luar la Getsemaní, dxel rëb Jesús loj ree xbejnman:

—Gol gurejsii guie, la'tgaj gabedx ganaaban Dios.

³³ Abi' binëman Bëd, Jacob con Waj, dxel guzu-loj guyunayaman abi' ad nixtri yu' luxdooman.

³⁴ Zianz rëbaman loj reeman:

—Yu' naya da't luxdon, rulüü ma gugüjtan naj. Gol baya'n guie ad gaayëjsidi.

³⁵ Abi' guzaman zata'n, zianz gurerulojman, gunabaman loj Dios, bal zile' tēd ni naj sagdiajman. ³⁶ Chi cabejdx canabaman Dios, rēbaman:

—Dad, graczi zajc güünl. Babēē naj loj ni gaza-agdiajn. Per ad gac zi'c rēnan, rayal gac zi'c rēnl.

³⁷ Dxel ziaman lod baya'n ree xbejnman, chi badxinman cwē' reeman laa reeman naga'yējs, zianz rēbaman loj Bēd:

—Simón, ¿naga'yējsil ya? ¿Ni'qui tib hor ad gojct nibejnaal ya? ³⁸ Gol gurenaa, gol gurejdx gunab Dios chitēē güün xindxab lējt gan. Din rēndi güüdi zi'c rayal, per xcuerpidi ad rtiējbtan.

³⁹ Dxel zēman zatijb persi gurejdx gunabaman Dios con diidx guin gajc ree. ⁴⁰ Chi badxinman lod riga' reeman, laagajc reeman naga'yējs zatijb, guial yu' da't bacaal loj reeman, abi' ni'quid radxejlt xhie guiēb reeman lojman. ⁴¹ Ni bayon volt badxinman, rēbaman:

—¿Sta naga'yējsidi ya? ¿Sta cayziiladxidi ya? Gol batie'ch xbaaalidi din naj, najn Bén guxhaal Dios ma bidxin hor yayü reeman naj loj ree bēndol. ⁴² Gol bixche, yo' ree, laa bēn yayü naj ma zēēd gajxh.

Gunaaz reeman Jesús

(Mt. 26:47-56; Lc. 22:47-53; Jn.18 :2-11)

⁴³ Sta caneenē Jesús laa reeman chi bidxin Judas, bēn goc tijb ree xbejnman. Bidxinnēman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel. ⁴⁴ Abi' Judas bēn bayü laaman ma bagojnxgajman bēn guin ree rēbaman:

—Bén gawan xid, laaman naj Bén raguilidi, gol gunaazaman gol chinëman, gol gojpaman ad guslaadi laaman.

⁴⁵ Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid. ⁴⁶ Zianz gunaaz ree Bén guin laaman din chinë reeman laaman. ⁴⁷ Per tijb Bén za' yagaj gulëë xiespadaman, gutü'man guidiajg xmojs bixhioz rniabee gra ree bixhioz. ⁴⁸ Dxel rëb Jesús loj ree Bén guin:

—¿Chexc zeel zëedidi con espad con yag din chinëdi naj zi'c tijb xingubaan? ⁴⁹ Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

⁵⁰ Dxel graczi ree xbejn Jesús baxüün, guro'nladx reeman laaman.

Tijb xin binal Jesús

⁵¹ Per guyu tijb xinguiag binalix Jesús, nadüübix tijbzi lajd. Abi' chi gunaaz ree Bén guin laax, ⁵² baslaagajquix lajd guin, zigxüünt ziladix.

Za' Jesús loj ree guxtis

(Mt. 26:57-68; Lc. 22:54-55, 63-71; Jn.18 :12-14, 19-24)

⁵³ Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley. ⁵⁴ Abi' zijt zijt binal Bëd Jesús xt rule' lidx bixhioz guin, dxel gurejman rudëj con ree Bén rajp rulidx bixhioz guin,

⁵⁵ Abi' ree bixhioz rniabee ree bixhioz con gra ree guxtis, baguiil reeman mod xhienaag gutedia' reeman Jesús din chile' gugüjt reeman laaman, per ad badxejlt xhienaag nutedia' reeman laaman, ⁵⁶ majsi zien reeman rudxiib diidx rusquiee guijcaman, per garent garen rëb tijb gaj reeman. ⁵⁷ Dxel guzuli tio'p choon reeman gunee reeman diidx rusquiee ree contr laaman, rëb reeman:

⁵⁸ —Dunujn baguiejn rëbix: “Naj guse'n yadooro' Jerusalén ni been ree bejn, abi' choon dxejzi yayünanan sin xyudar ree bejn.”

⁵⁹ Per ni'qui zian ad gunee reeman tibloj, garent garen gunee reeman.

⁶⁰ Dxel bixhioz rniabee gra ree bixhioz guzuliman galay ree bën riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr lüj ya?

⁶¹ Per achetczi rëb Jesús, ad badxi'taman diidx, dxel gunabdiidx bixhioz rniabee guin lojman zatiyb, rëbaman:

—¿Lüj naj Cristo ya, Xi'n Dios Bén nagle'?

⁶² Badxi' Jesúsán rëbaman:

—Walican, najcan. Abi' lëjt zuguaadi naj najn Bén guxhaal Dios zooban xladbee Dios Bén ca' gra guialrniabee guguaa tëedi naj guialan loj zaj xanyabaa.

⁶³ Chi biguiejn bixhioz guin zian, gudixya' xabaman, dxel rëbaman:

—Ad rüjntri naguiejn yadiil ree testiw. ⁶⁴ Lëjt ma biguiejn canee guijdxix Dios. Yan, ¿xhie nadi?

Abi' graczi reeman rëb, guiëtaman.

65 Yu' reeman rucojp xhiejn lojman, ruta'cw tēē reeman lojman, dxel riguin reeman laaman, rēb reeman:

—jGuneeya' chu gudin lūj!

Guiáad ree bēn rajp yagaj wēēz reeman lojman.

Rēb Bēd ad nūnbeetaman Jesús

(Mt. 26:69-75; Lc. 22:56-62; Jn.18 :15-18, 25-29)

66 Chi za' Bēd rule' guin, dxel bidxin tijb bēngunaa rūjn dxiin lidx bixhioz rniabee guin.

67 Chi baguiaaman zojb Bēd rudēj guin cucha'man, baguiaaman lojman, dxel rēbaman:

—Nē lūj za'nē Jesús bēn Nazaret.

68 Per gurexuu Bēd rēbaman:

—Ad nūnbeetan laaman, ad ragbeetan xhienin rnieel.

Chi bariiman ro' port guin, dxel guridxa' guid.

69 Dxel baguiaa bēngunaa guin Bēd zatijb, zianz guzuloj rēbaman loj ree bēn riga' yagaj:

—Nē bēn guin naj xbejn Jesús.

70 Per gurexuu Bēd zatijb. Gojc xchejdoo rēb ree bēn riga' yagaj loj Bēd:

—Walican nē lūj naj xbejnx din xin Galilea lūj, abi' zi'cgajc rniee reeman rnieel.

71 Per guzudxi'ch Bēd con ni rēbaman, zianz rēbaman:

—Gudēēd Dios naj casti bal rusquieen, ad nūnbeetan bēn nadi.

72 Loj hor zii gajc barojp volt guridxa' guid. Dxel basaalex Bēd guial rēb Jesús lojman: “Chi gad guid cwidxa' tio'p volt, mal gojc choon volt rēbil ad nūnbeetil naj.” Chi basaalexaman zian, dxel guzuloj cayoonman.

15

Binë reeman Jesús loj Pilato

(Mt. 27:1-2, 11-14; Lc. 23:1-5; Jn.18 :28-38)

¹ Chi bareguiaal rsildoo, badxajg lasa' ree bixhioz rniabee ree bixhioz con ree guxtis Israel në ree mextr rajc ley con gra ree guxtis, abi' baya'n reeman diidx xhienaag güün reeman. Dxel guxhii reeman Jesús binë reeman laaman loj Pilato. ² Abi' gunabdiidx Pilato loj Jesús rëbaman:

—¿Lüjn naj xrey ree bën Israel ya?

Badxi' Jesús laan rëbaman:

—Najcan.

³ Abi' ree bixhioz rniabee ree bixhioz zien ni rudxiib reeman guijcaman, ⁴ zeel gunabdiidx Pilato lojman zatijb, rëbaman:

—¿Nid xhie diidx yadxi'l ya? Baguiaa dád zien ni rudxiib reeman guijquil.

⁵ Per achetczi badxi' Jesús, zeel dád badxa loj Pilato

Gunabee reeman guiët Jesús

(Mt. 27:15-31; Lc. 23:13-25; Jn.18 :38–19:16)

⁶ Loj ree dxej lanij pascw, ruslaa Pilato tijb bën yu' ladxguuib, bën rëb ree bën guiedx guin guslaaman. ⁷ Lën ree dxej zii yu' bën la Barrabás ladxguuib con ree ben ren, bën bagüjt ree bejn loj tijb wadijl ni been reeman contr gobiarn. ⁸ Dxel chi bido'p ree bejn, rëb reeman loj Pilato din güünman zi'c naj costumbr, ⁹ Abi' rëb Pilato loj reeman:

—¿Rëndi ya guslaan xreydi?

10 Rëbaman zian guial ragbeeman bayü ree bixhioz guin laaman por guial rdëdlojzi reeman laaman. 11 Per ree bixhioz rniabee guin badxe' reeman bejn ree diidx din guiëb reeman loj Pilato guslaaman Barrabás. 12 Abi' gunabdiidx Pilato loj reeman rëbaman:

—¿Xhie rëndi günnë'n bën nadi naj xreydi?

13 Dxel gurixdiaj reeman rëb reeman:

—¡Bacaax loj crüjz!

14 Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—¡Bacaax loj crüjz!

15 Abi' guial rën Pilato yaya'nman zagdxe loj reeman, zeel baslaaman Barrabás, gunabeeman a Jesús, dxel bayüman laaman loj reeman din tiaman loj crüjz.

16 Abi' binë ree xin suldad guin Jesús xlule' palas, yagaj badxaag lasa' gra reex. 17 Abi' bascajcw reex laaman tijb lajd murad, dxel been reex tijb coron guiëjch badxe' reex guijcaman. 18 Dxel guzuloj rbixdiaj reex rëb reex:

—¡Guibanri xrey ree bën Israel!

19 Zianz rugaz reex var guijcaman, rulaa xhiejn reex lojman, abi' ruzuxib reex lojman. 20 Chi gulox baze' reex laaman, babëë reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

*Bacaax reeman Jesús loj crüjz
(Mt. 27:32-44; Lc. 23:26-43; Jn.19 :17-27)*

²¹ Chi zinë reex Jesús, badxaagloj reeman tijb bën Cirene, laman Simón, xdad Lejandr con Rufo, ziaadaman bazaman dajn. Abi' been ree suldad guin naguiejn biaaman xcrüzj Jesús.

²² Abi' binë reex Jesús luar la Gólgota, rën guiëban Calaver. ²³ Yagaj badëöd reex vin no'ch ni la mirra lojman din guië'man laan, per ad gu'taman laan. ²⁴ Chi ma bacaa reex laaman loj crüzj, dxel gudxijt reex suert guijc xabaman din guidoon xhie yayal tijbgaj reex

²⁵ Raca gaa rsil bacaa reex laaman loj crüzj. ²⁶ Guijc crüzj guin bacaa reex lejtr ni rëb chexc zeel bacaa reex laaman loj crüzj, rëban: “Xrey ree bën Israel.” ²⁷ Chi bacaa reex laaman loj crüzj, në zatio'p ree xin gubaan bacaa reex loj crüzj, tijbix cwa xladbeeman, zatijbix cwa xladruvejsaman. ²⁸ Zian gojc cumplid ni ca loj xtiidx Dios, lod rëb: “Nayabaman loj ree benmal.”

²⁹ Abi' ree bën ridëd yagaj ruze' reeman laaman runij guijc reeman, rëb reeman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb, ³⁰ yan baslaa lüj gajc baguiajt tëë loj crüzj zii.

³¹ Ziangajc ruze' ree bixhioz rniabee laaman con ree mextr rajc ley, rëb reeman:

—Gognëx ben ren ree, guiáad laax ad rajct ruslaa laagajquix. ³² Yaguiajtix loj crüzj guin, bal laax naj Cristo, xrey ree bën Israel, din yaguiaa ree, dxel validuladx ree.

Xt në ree xingubaan canëman loj crüzj guneeguidx laaman.

*Güjt Jesús**(Mt. 27:45-56; Lc. 23:44-49; Jn.19 :28-30)*

³³ Chi gol garol dxej, bicajy guidib guidxliuj xt raca choon wadxe. ³⁴ Dxel raca choon guin gurixdiaj Jesús rejs, rëbaman:

—Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëëladxil naj? ³⁵ Yu' ree bën za' yagaj biguiejn, abi' rëb reeman:

—Gol bacaagdiajg niad. Laax cabejdx Elías bën badëë xtiidx Dios loj ree bejn.

³⁶ Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguaiaa ree don zi't Elías yalet laax loj crüjz guin ya.

³⁷ Per Jesús dád rejs gurixdiajman, dxel güjtaman. ³⁸ Loj hor zii goxya' lajd nal lën yadooro' Jerusalén, gojcan tio'p lala', diizd guiyc guin xt guia' guin goxya'. ³⁹ Dxel suldad rniabee ree suldad guial za'x niz loj Jesús. Chi baguiaax xhienaag güjtaman, rëbix:

—Walican, Xi'n Dios bën guin.

⁴⁰ Në tio'p choon ree béngunaa za' zijt ruguiaa ni cayajc. Loj ree béngunaa guin no'ch María Magdalena, në Salomé në Li xniaa Xiëb con Jacob bën naj benguiag loj Xiëb. ⁴¹ Béngunaa guin ree binal Jesús, been tëë reeman laaman yudar chi guzuman Galilea, në zien ree béngunaa ren binal laaman diizd Galilea xt Jerusalén.

*Biguie'ch Jesús**(Mt. 27:57-61; Lc. 23:50-56; Jn.19 :38-42)*

⁴² Chi bidxin dxej rüjn ree bén Israel gra, chi guixiezi naj dxej raziiladx reeman, ma cabej guiaal, ⁴³ bidxin Xiëb bén za guiedx Arimatea. Gojcaman tijb xguxtis ree bén Israel, abi' gojp ree bejn laaman respejt, në laaman rbëz xguialrniabee Dios, abi' guyuman valor wejman loj Pilato, persi banabaman xcuerp Jesús. ⁴⁴ Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walin. ⁴⁵ Abi' rëb suldad guin guial walican ma güjtaman, dxel cwëjb Pilato baca' Xiëb cuerp guin. ⁴⁶ Guzii Xiëb tijb lajd, abi' chi baletaman xcuerp Jesús loj crüzj guin dxel batüübaman laaman lajd guin, biquie'chaman laaman lën tijb baa ni bidëen lën tijb guiaj, dxel basiaawaman ro' baa guin con tijb guiajro'. ⁴⁷ María Magdalena con Li xniaa Xiëb, baguiaa reeman lod baquie'ch reeman Jesús.

16

Raban Jesús

(Mt. 28:1-10; Lc. 24:1-12; Jn.20 :1-10)

¹ Chi gudëd dxej raziiladx ree bejn, María Magdalena, në Salomé, në Li xniaa Jacob, bisii reeman perfum din chitëeb reeman laan xcuerp Jesús.

² Bareguiaal chidumingw, rsildoo brii reeman wej reeman ro' xbaa Jesús, naabzi rliejn gubijdx. ³ Chi zë reeman lunejz, rëb loj lasa' reeman:

—¿Chuza chisüd guiaj nayaaw ro' baa guin?

⁴ Per chi bidxin reeman baguiaa reeman ma biniib guiaj za' ro' baa guin ad za'tri loj xluaran.

⁵ Chi guyu reeman lën baa guin, baguiaa reeman

tijb xinguiag zojbix ladbee, najcwix lajd naquich yool, abi' bidxeb reeman. ⁶ Per rëbix loj reeman:

—Ad rdxebidi, raguiilidi Jesús bén Nazaret bén cwa loj crüzj. Per ma babanman, achutri laaman guie, gol baguiaa lod gudixh reeman laaman. ⁷ Yan, gol chej gol chiguiedx loj Bëd në loj los demazri ree xbejnman guial yaloj Jesús ned cheman Galilea dxel chedi, ni guguaaadi laaman zi'c ma naman lojdi.

⁸ Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

*Balüüloj Jesús loj María Magdalena
(Jn. 20:11-18)*

⁹ Chi ma baban Jesús, chidumingw rsildoo, yaloj loj María Magdalena balüülojman, bén babëëman gajdx xindxab luxdoo. ¹⁰ María Magdalena guin bicojn ree xbejn Jesús, bén yu'naya ree roon tëë reeman por laaman. ¹¹ Chi biguiejn reeman guial naban Jesús baguiaa tëë María Magdalena laaman, ad bililadxt reeman.

*Balüüloj Jesús loj tio'p ree xbejnman
(Lc. 24:13-35)*

¹² Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn. ¹³ Dxel bén guin ree bicojn lasa' reeman, per ni'qui laa reeman ad bililadxt reeman.

*Rucaabee Jesús bén naj ree apóstoles
(Mt. 28:16-20; Lc. 24:36-49; Jn. 20 :19-23)*

¹⁴ Ni bigratë balüüloj Jesús loj za chiptib ree xbejnman, chi zojb reeman xan mex cayaw reeman, gudilëman laa reeman guial nad reeman, ad

rliladxt reeman b́en baguiaa ree laaman guial ma babanman. ¹⁵ Dxel ŕebaman loj reeman:

—Gol chej guidib guidxliuj, gol chigtie'ch xti-idxza'c Dios loj gra ree bejn. ¹⁶ B́en chililadx tiobnijs t́eē zajcaman perdon loj Dios. Per b́en ad zaliladxt xtiidxza'c Dios, laaman yayal casti. ¹⁷ Sen guie ree gap ree b́en chililadx naj: Por da guialrniabeen zab́eē reeman xindxab luxdoo ree bejn, zanee t́eē reeman diidx ren ree, ¹⁸ zanaaz reeman b́eēl ree, abi' majsi guiē' reeman ni yu' venen guijc achet gac reeman, chi gudxiib yaa reeman guijc ree b́enragxuu, zayajc reeman.

Bayē'p Jesús xanyabaa

(Lc. 24:50-53)

¹⁹ Chi gulox guneenē Dad Jesús laa reeman, dxel bayē'paman xanyabaa, gurejman xladbee Dios. ²⁰ Guiáad laa reeman brii reeman zigtie'ch reeman xtiidxza'c Dios guidibczi. Abi' Dad Jesús gognē laa reeman, been reeman milagr ree, persi gogbee ree bejn guial xtiidxqui Dios naj ni rníee reeman. Amén.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

fb4ebcb8-e1f4-5bfc-b08c-f590e137d86d